

**S** **LO**  
Afl. 1.25

BRIYANDO FUERTE • TRECIENDO CLARIDAD  
DIABIERNA 10 MEI 2024

*Di Pueblo*

**SOLO SALUD**

**CON PA CUIDA BO SALUD  
MENTAL STRATEGIA PA  
BIENESTAR INTEGRAL**



**WWW.SOLODIPUEBLO.COM**



**SOLODIPUEBLO@GMAIL.COM**

## LEY DI MATRIMONIO A KEDA EMPATA 10-10

Mansur tuma vengansa contra  
Dowers pa su voto

**DEN E PACTO DI GOBIERNO DI AVP  
ACCION 21 PA FUTURO GOBIERNO,  
DOWERS NO POR TA MINISTER DI  
HUSTICIA**



Shailiny Tromp-Lee  
a abstene: E no ta cla



## TIROTEO NA MEIVELD: HOMBER CU A RICIBI BALA A CORE SU MES AUTO BAY HOSPITAL



Diahuebs atardi den careda di 4.30 a sosode un tiramento of tiroteo na altura di Meiveld. Aki un homber a keda alansa pa bala. E mes como chofer di auto a core su auto dirigiendo su mes na hospital pa ricibi promer ayudo. Na Hospital su auto a keda confisca y a haya un arma tambe den su auto. Mientrastanto na Meiveld tin mas investigacion tumando lugar pa mira ken mas ta involvi. E victima a yega hospital den un Kia Serato bruin. Tambe tin un Honda Fit shinishi involvi. E persona den e Kia Cerato a saca un arma color nikkell y a los tiro. E persona den Honda Fit tambe a saca arma y los tiro dirigi riba e victima cu a alcanza e victima den lomba. Esaki a produci hopi sanger den e auto Kia Cerato. E caso ta bao investigacion.

**AUTORNAN DI LEY DI  
MATRIMONIO NO TABATA TIN  
SPLICACION Y A CONTESTA;  
"BAY PUNTRA  
GOOGLE"**

Google



# Shailiny Tromp-Lee a Abstene!

## DIARANSON ANOCHI, PARLAMENTARIO DI MEP SHAILINY TROMP LEE A ABSTENE DI VOTA ESAKI A BIRA NOTICIA DI E MOMENTO

E parlamentarario a splica su postura den un comunicado:

Den mi 7 aña den Parlamento ta mi prome biaha cu mi ta abstene y mi kier pa boso sa cu mi abstencion tabata mi decision. Pero Shailiny, pakico bo a abstene? Dicon no tuma un decision? Mi kier tuma e espacio pa mi ta sincero cu boso y pa mi comparti mi sentimentonan "curu". E ley aki desde un principio tabata hopi dificil pa mi.

Un debate interno basta pisa a tuma y ta tumando lugar ainda. Mi ta memey. Memey paso mi ta compronde y mi ta sinti pa tur dos banda. Di cas mi ta hopi religioso y esaki ta un fundeshi fuerte di mi fe, mi paz y mi estabilidad. Diariamente mi a y ta bati na porta di Papa Dios pa gradici y pidi. Den mi bida mi a pidie pa E haci milager y obra den salud di mi yiu y mi casa. Mi a bib'e di cerca. Dios a haci e milager den mi bida, el a

sana mi yiu y mi casa.

Di otro banda mi ta sinti pa e dicho amor ta amor. Mi no ta sinti ta na ami pa dicidi ken si of ken no. No ta na ami pa stroba felicidad di otro. Ken ami ta pa husga amor? Ami ta convenci cu mi Dios ta un Dios di amor. Mi dilema ta grandi y mi debate interno ta fuerte.

Den mi trayectoria di bida ami semper tin mi opinion, por argument'e y present'e. Echo ta, cu pa e



topico aki esey ainda no ta e caso.

## AUTORNAN DI LEY DI MATRIMONIO NO TABATA TIN SPLICACION Y A CONTESTA; "BAY PUNTRA GOOGLE"

E ley di matrimonio di mes sexo no tabata un ley cu base solido y investigacion concreto.

Tabata mas bien un grito pa complace e gusto pa "casa". Varios pregunta riba e ley no a wordo contesta.

Mas remarcabel ta cu

hasta a duna como contesta: Bay puntra Google. Pues esey a cay masha malo pero na mes momento a trece dilanti cu e autornan di e ley no tin ningun estudio di impacto y consecuencia.

Pa presenta un ley, bo mester a studia tur

detaye profundamente y percura pa tin contesta riba tur pregunta.

Unaves cu bo no tin contesta, ta trece duda. Pasa ley pa gusto of smaak of agenda di algun no ta responsabel.

**CAMBIA  
PERSPECTIVA TOCANTE  
OBESIDAD:  
SA BO NUMBER Y MIDI BO PESO**





# MANSUR TUMA VENGANSA CONTRA DOWERS PA SU VOTO:

Den e pacto di Gobierno di AVP - ACCION 21 pa futuro gobierno, Dowers no por ta minister di husticia

Despues di reunion di parlamento, Miguel Mansur tabata hopi rabia y hostina.

E tabata rabia cu Arthur Dowers kende a vota contra su ley.

El'a manda advertencia pa Avp, cu den un supuesto futuro gobierno entre Accion 21 y AVP, Arthur Dowers no por bira Minister di Husticia.

Esaki ta manera un reglamento di cuenta pa

e hecho cu Dowers a voto contra e ley.

Pacto:  
E declaracion aki cu tabata den un momento di rabia di Mansur, parce Mansur a papia su lenga voorbij, papiando riba e pacto secreto entre Avp y Accion 21 pa forma gobierno den futuro.

Mas cu claro cu esaki ta un baño di awa frieuw pa comunidad cu no tabata sa cu Avp a cera pacto cu Mansur.



## LEY DI MATRIMONIO A KEDA EMPATA 10-10

Diaranson mainta 9.or a inicia e reunion pa trata e ley di Mansur y Misha Raymond pa legalisa matrimonio di mes sexo.

Despues di varios ora di debate a yega na votacion pasa di 9or di anochi. E votacion a termina 10 na favor, 10 contra y 1 parlamentario a abstene.

Cu empate aki, e ley no a pasa y awor mester wordo yama den 30 dia pa bolbe wordo vota. (8 juni 2024)

Mientrastanto ta enespra di veredicto di corte di casacion. Cu tambe por tin su influencia depende e resultado.

Hightlights di e reunion ta cu Dowers y Eman a vota contra, mientras cu di Mep, Setty Christiaans Yarsagaray a motiva di lo vota na favor pa sostene su ruman. Shailiny Tromp Lee a abstene di vota, pa cual ela splica cu e no por a haya su mes ainda den e dilemna aki.

Marisol Tromp den su discurso no a papia nada di e ley, pero tabata zundra riba e votacion, exige pa parlamento vota.

Un ley di matrimonio cu no por a produci ningun contesta, pasobra Misha Raymond a manda parlamentario pa bay google.

Ningun estudio di impacto ni nada.

Kico awor?

Awor mester laga e barco sigui nabega, sperando casacion pa djey spera e reunion wordo yama atrobe.

## VOTONAN DI LEY DI MATRIMONIO: 10 votonan contra ta:

- |                      |                               |                            |                                |
|----------------------|-------------------------------|----------------------------|--------------------------------|
| Hendrik Tèvreden MEP | Darlaine Erasmus - MEP        | Edgard Vrolijk Pres. - MEP | Mike Eman - AVP                |
| Marco Berlis - MEP   | Alvin Molina - MEP            | Arthur Vallejo - MEP       | Abstencion: Shailiny Tromp Lee |
| Ricky Hoek - MEP     | Rycond Santos - Independiente | Arthur Dowers - AVP        |                                |

## 10 votonan nan PRO ta:

- |                     |                      |                       |       |                       |
|---------------------|----------------------|-----------------------|-------|-----------------------|
| Miguel Mansur - A21 | Raiz                 | Gerlien               | Croes | Mike De meza - Avp    |
| Misha Raymond Raiz  | Marisol Tromp - Mas  | - independiente       |       | Benny Sevinger Avp    |
| Raymond Kamperveen  | Aguanette Gunn - Mas | Mervin Wyatt Ras- Avp |       | Setty Yarsagaray- MEP |



Minister Rocco Tjon:

# FADA Y ARUBABANK CU CONFERENCIA EXITOSO PA CU SALUD MENTAL “MIND MATTERS”



ORANJESTAD - Diamars anochi, a tene e conferencia “Mind Matters” organisa pa Fundacion Anti Droga Aruba (FADA) y ArubaBank, den cuadro di salud mental, cual ta un topico sumamente importante. Salud mental no ta solamente brinda e cuido na tur esnan cu tin mester di esaki, tampoco e ta solamente e parti di diagnostica, pero e ta hopi importante pa kibra e taboo, pa crea comprension y brinda sosten pa di e forma aki, esnan cu tin mester di e cuido aki, sinti nan mes confortabel suficiente pa busca e ayudo necesario.

Manera ta conoci, Ministerio di Husticia y Asuntonan Social conhuntamente cu demas stakeholders cu ta traha den e area di salud mental a bin ta tuma hopi pasonan concreto den e bon direccion pa cu salud mental. Esaki, no pa solamente e wordo adresa cu prioridad, pero pa esaki bira un derecho fundamental di cada

persona cu tin mester di e cuido aki.

Actualmente, nos ta conta cu e stuurgroep GGZ, cual a base di e stuurgroep aki, tur stakeholders ta sinta cada dos siman na mesa,

pa asina traha riba cada aspecto pa cu salud mental manera legislacion, financiamiento, desaroyo di cada profesional, pero tambe e parti di prevencion. FADA ta esun cu ta trek e parti

di prevencion, pa cual motibo a bin cu e iniciativa di e congreso di “Mind Matters”.

Como ministerio di Husticia y Asuntonan Social, e impacto cu salud mental tin riba individuo nan, riba nan famia y nos comunidad en general, ta algo cu sigur nos ta wak. Pa e motibo aki e ta asina importante pa organisa e tipo di conferencianan aki

pa por kibra e stigma.

Palabranan di pabien y gradicimento na e organisadornan, y tur stakeholder cu a aporta na e conferencia aki, pasobra ta e tipo di conferencianan aki ta loke ta yuda kibra e silencio, e stigma y e taboo. Na mes momento, nos ta anuncia, cu e segundo edicion di “Mind Matters” ta na caminda, cual lo ta na oktober binidero.





Prome Minister Evelyn Wever-Croes

# RELATO ANUAL 2023 TA DUNA SPLICACION EXTENSO RIBA E DIFERENTE DEPARTAMENTONAN BOU INFRASTRUCTURA Y PLANIFICACION

ORANJESTAD

Recientemente durante conferencia di prensa di Gobierno, Prome Minister Evelyn Wever-Croes a presenta e Relato Anual 2023 (Jaarverslag 2023), cu ta duna un bista riba tur e trabounan di Ministerio di Algemene Zaken cu a wordo haci durante aña 2023. Un di e topiconan cu a wordo cubri den e relato aki ta Infraestructura y Planificacion Teritorial, cu ta consisti di varios paragraf.

Den e prome paragraf cu ta cubri Directie Infrastructuur en Planning (DIP), ta duna un splicacion riba tur e retonan cu tin actualmente den e departamento aki, y di unda nan ta bin. Manera ta conoci, tin varios investigacion penal andando riba e diferente ministernan cu tabata tin infraestructura bou di nan encargo prome cu Gabinete Wever-Croes a drenta gobernacion. E



investigacionnan aki a paralisa e departamento, mirando cu tin varios personal di DIP cu ta na cas pendiente investigacion, causando asina cu e departamento tin un scarcedad na personal. Apesar di e situacion, den e relato

anual, por lesa tur loke DIP a logra den 2023. Den e siguiente paragrafnan e relato anual ta duna un splicacion extenso di e trabounan, cu apesar cu tin hopi reto andando, a wordo logra pa e departamentonan di Dienst Landmeetkundig

en Vastgoed Registratie (Kadaster), Dienst Openbare Werken (DOW), y Dienst voor Technische Inspectie (DTI). Prome Minister ta gradici tur departamento cu ta cay bou di Infraestructura y Planificacion Teritorial, pa nan trabou duro haci

durante 2023, apesar di reto, pa logra brinda miho servicio na nos comunidad. Den un siguiente conferencia di prensa, Prome Minister lo elabora mas di trabounan realisa y cu lo ta den planificacion pa wordo realisa.

## NA MACUARIMA CHAUFFEUR DI UN PICK-UP A SCUCHA SONIDO NA E WIEL Y ORA ELA BAY PARA ESAKI A REMENTA

Diamars atardi a drenta informe di un incidente na Macuarima, mesora a dirigi un patruya na e sitio. na yegada di e patruya a bin compronde cu aki ta trata di un incidente unda e chauffeur mientras e ta coriendo ela scucha un sonido di batimento na e wiel y ora ela bay para, e tire a rementa y causa daño.





# MINISTER XIOMARA MADURO TABATA PRESENTE NA “DIA DE LA GUAJIRIDAD” NA RIO HACHA, COLOMBIA DURANTE CUAL A OTORGA VARIOS RECONOCIMIENTO NA SR. RAMON TODD DANDARÉ



Recientemente riba Dia de la Guajiridad, Fundación Compartamos la Felicidad y InspirArte a organisa un evento "La Guajira en el Gran Caribe Diálogos sobre Aruba," na Centro Cultural di Banco di República na Riohacha, Colombia. Un actividad durante cual a destaca e lasonan historico, economico y cultural entre Guajira y Aruba. Minister di Cultura, Xiomara Maduro tabata presente riba invitacion di e organizacionnan organizado. E mandatario a tene un discurso den cual ela elabora riba e union entre La Guajira y Aruba.

Durante di e actividad aki, e organisadonan a entrega varios reconocimiento na e

linguista y Papiamentista, Sr. Ramon Todd Dandaré, pa su importante aporte na cultura, educacion, investigacion y conservacion di nos lenga materno Papiamento. Apesar cu el a bin mucha na Aruba, unda el a wordo lanta y educa, Sr. Todd Dandaré ta recorda su origen Guajiro den tur evento of conferencia local y internacional, unda semper e ta menciona su ciudad natal Riohacha. P'esey den cuadro di e celebracion di Dia di Guajiridad, e Asamblea Departamental di Guajira a otorga e condecoracion mas halto y importante di e Departamento di Guajira, Luis A. Robles Suarez na Sr. Todd Dandaré. Tambe e Consejo Distrital di

Riohacha a duna nan respectivo reconocimiento na Sr. Todd Dandaré. Ademas otro intancianan manera Fundación Teatro Aurora, Fundación Compartamos la Felicidad y Asociación Kojutajirawaa a honra e bida y obra di Todd Dandaré.

E mandatario ta informa cu e charla "Guajira en el Gran Caribe Diálogos sobre Aruba", a wordo duna pa e historiador y autor, Sr. Fredy González Zubiría, unda el a destaca diferente aspecto cu ta uni nan departamento cu nos isla. Otro orador sra. Katherin Pérez, Directora di e Programa Economia na Universidad di Guajira, kende a elabora entre otro riba e posibilidad economico entre ambos region.

Despues tabatin un panel cu participacion di sr. Fredy González, sr. Benjamin Romero, sra. Katherin Pérez y sr. Ramón Todd Dandaré. Sr. Romero a honra e memorianan di varios persona di origen Guajiro cu a establece na inicio di siglo pasa na Aruba y nan a haci di nos isla nan di dos patria. E moderador tabata e hurista, academico y promotor di e cultura Wayuu, sra. María Isabel Cabarcas kende ta directora ehecutivo di InspirArte. Na final Sr. Esteban Narváe kende ta gerente di Centro Cultural di Banco di Republica, a gradeci e participacion y aceptacion di e invitadonan y publico presente pa e evento aki por a bira uno exitoso.

E mandatario a gradici



e organisadonan pa e e invitacion y a felicita sr. Ramon Todd Dandaré pa tur e reconocimentonan cu ela ricibi. Minister Xiomara Maduro na

nombre di Gobierno y pueblo di Aruba a gradici sr. Ramon Todd Dandaré pa tur e trabounan cu e ta haci na bienestar di pais Aruba.

**Delicioso 10- Mei**

**Come dushi, Come Bon**

**Spaghetti + Carni mula**  
Garlic bread, green salad  
**Mochi pisca**  
aroz-Funchi-banana-pampuna  
**Chicken cutsmall**  
Aroz- Green salad  
**Porkchop den sauce ciboya**  
batata machika- vegetables

**Oké take away..** Order Now  
746-3571  
565-3232  
Santa cruz 36



# MINISTER THIJSSEN A ASISTI NA RECEPCION DIA NACIONAL DI POLACO



Den Haag – Minister Plenipotenciario mr. Ady Thijsen a atende e recepcion na ocasion di Dia Nacional di Polaco. Minister Thijsen a felicita embahadora Margareta Kassangana

cu e celebracion di nan dia nacional.

Durante di e recepcion Minister Thijsen a haci uso di e oportunidad pa papia cu embahador di otro paisnan y asina

fortalesa su network den e mundo diplomatico na Den Haag.

Nota pa redaccion:

E potretnan ta cortesía di Arubahuis



## EXPOSICION JOLLY PAINTER

Jolly Painters ta presenta nan prome exposicion na biblioteca. Esaki ta habri dialuna dia 13 di mei pa 1 siman largo durante orario regular di biblioteca. Jolly painters ta un grupo di cuater amiga cu ta pinta hunto regularmente, disfrutando nan hobby. Nan ta Babs (Barbara) Kroonenberg, Adelaida Ponson, Elo Lee y Vivian Storm-Croes.

Cada un tin nan gusto/estilo diferente y esey por nota tambe den e obranan. Abstracto, naturaleza, colorido, romantico, fantasia.

Tambe tin mas obra di man manera boter decora. Pues basta articulo interesante pa admira.

Apertura di e exposicion ta



dialuna dia 13 di Mei 2024 di 6or pa 8or den sala di Exposicion na

Biblioteca Nacional Aruba. Esaki ta keda habri te cu diabierna

dia 24 di mei 2024. Publico ta bonbini.



# DIA MUNDIAL DI PARHANAN MIGRATORIO

## 2024: PROTECCION DI INSECTO TA PROTEHA PARHANAN

ORANJESTAD - E dia observa mundialmente yama 'World Migratory Bird Day' (WMBD) cu ta un campaña di dos biaha pa aña pa conscientisacion cu ta enfoca riba e necesidad di conservacion di parhanan migratorio y nan habitat. E meta ta pa alcanza efectividad di conscientisacion mundial di e retonan cu e parhanan migratorio ta encontra, nan importancia ecologico, y e necesidad di cooperacion internacional pa conserva nan.

Directie Natuur en Milieu (DNM) tambe ta duna un aporte local pa cu e dia observa aki. Manera nos tur sa, Aruba tambe ta anfitrión di e grupo di parhanan migratorio cu ta bishita nos pa descansa, recarga of tambe broei pa despues nan bay bek nan luga di origen. Den cuadro di esaki, DNM ta trece dilanti algun punto pa comunidad tene cuenta cu ne como tambe algun data cu ta pertenece na e tema cu ta enfoca e aña aki riba e importancia di insectonan pa e parhanan migratorio.

Tur aña, riba e di dos diasabra di luna di mei y esun di october ta observa e fecha mundial pa parhanan migratorio. Hendenan rond mundo ta tuma accion y ta organisa eventonan educacional publico, exhibicion y festival, evento di observacion di parhanan pa asina celebra WMBD. E aña aki e tema ta enfoca riba e importancia di insectonan. Pa prome biaha un campaña ta enfoca riba insectonan pa e parhanan migratorio y e menasa cu e poblacion di e insectonan ta encontra.

Insectonan ta fuente esencial di energia pa parhanan durante nan temporada di broei, viahe y nan migracion en general. E insectonan ta contene hopi nutriente y ta fuente di proteina pa parhanan migratorio. E parhanan tin necesidad di bon nutricion pa nan mes pero tambe pa nan duna di come na nan yiunan. Asina ta sigura existencia di diferente sorto di parhanan migratorio. E presencia di insectonan ta aporta grandemente na e momento di migracion di parhanan. Durante nan parada na diferente luga riba nan ruta, e parhanan ta busca insectonan den mondi, saliñanan of otro habitat. Tambe nan ta busca pa gara insectonan den aire of ta coba pa esakinan den troncon di vegetacion. Hopi biahe of migracion di parhanan ta coincide cu abundancia di insectonan na e localidad di descanso.

Migramiento di parhanan ta un fenomeno natural cu a bin ta captura imaginacion di hende di diferente cultura y decada. E biahe aki ta envolve movimiento masal di parhanan cu ta bula distancianan largo cu ta cubri continentenan, guia pa nan instinto, señalnan di medio ambiente, y tambe compañía cu strategia. E migracion ta un comportacion compleho cu ta sirbi propositonan ecologico, evolucionario y di sobrevivencia. Pero e migramento di parhanan ta un fenomeno bou menasa. Esaki ta particularmente pavia cu e poblacion di insecto, di cual e parhanan ta depende, ta bahando

drasticamente.

Akinan DNM ta inclui poco mensahenan importante di e interdependencia di insectonan cu e parhanan. Tin un urgencia pa cu accion pa e proteccion di insectonan.

- Presencia di insectonan ta influencia grandemente e tempo, duracion y exito general pa e migracion di parhanan. Durante e trayecto, parhanan ta para na diferente luga riba nan ruta. Nan ta busca pa insectonan den areanan di cosecha, mondi, saliñanan, 'wetlands' y otro habitat.

- Parhanan cu ta come insecto ta cubri un variedad diverso di insectonan den nan dieet. Esakinan ta inclui abeha, sangura, musca, bichi, barbulet, tor y tambe invertebra acuatico

manera e spirito di cabrito (tambe yama dopi dopi). P'esey no ta tur ora ta bon pa spuit cu insecticida. Parhanan cu ta come insecto ta yuda combati infestacion di insectonan cu por causa daño na cosecha of tambe combati plaga cu ta propaga malesa.

- 85% di matanan cu ta floria ta rekeri polinizacion y esaki hopi biaha ta trabou di insectonan. P'esey si nos perde e polinisantenan nos matanan lo lucha pa biba y tambe parhanan cu ta depende di nan.

- Mantencion y restauracion di areanan cu tin awa manera damnan, saliñanan y 'wetlands' ta esencial pa proteccion di e grupo di parhanan acuatico cu ta come insecto.

- Observacion y

monitoreo di parhanan migratorio uzando ciencia cu ta envolve participacion di hende ta yuda cu conscientisacion. Manera ken no ta corda e conteo nacional di parha, algo asina tambe por haci pa esunnan migratorio. Pa medio di campaña educacional di medio ambiente y naturalesa por duna data importante pa restaura y maneha habitatnan esencial cu ta beneficia y conecta parhanan migratorio.

DNM ta felicita un y tur cu e dia Mundial di parhanan migratorio 2024.

Ban para keto na e importancia di e diferente parhanan migratorio cu ta existi. No solamente pa admira nan pero pa reconoce nan importancia y cu nan ta depende di insectonan.







Horoscop pa 10 di mei 2024

Feliz y productivo diabierna. Awe Solo di Pueblo ta presenta bo horoscop pa dia 10 di mei 2024.

**Aries**  
E discusionnan familiar ta toca su fin. Si nan propone bo un inversion, analisa e riesgo. Bo por logra haya miho condicion di trabao. Haci dieta di forma controla. Number di suerte: 16, 32, 2.

**Tauro**  
No wak atas, bo no por rebiba amornan pasa. E recuperacion ansha economico a yega. Suavisa

bo caracter y no agobia e compañeronan. Bo por haya verkoud, cuida bo mes pa purba evit'e. Number di suerte: 83, 79, 8.

**Geminis**  
Si bo no tin pareha, disfruta di bo libertad. Ta momento pa haci e biahe di bo soñonan. Bo ta pensando pa cambia di trabao, warda algun dia. No retrasa mas bo bishita n'e dentista. Number di suerte: 65, 41, 3.

**Cancer**  
Purba mantene calma cu bo pareha. Tanto gasto lo caba pa resenti bo economia. Lo bo sña maneha bo mashinnan

nobo pa bo trabao. Pone atencion na bo culpa y si bo ta cansa, descansa un rato. Number di suerte: 33, 36, 4.

**Leo**  
Bo personalidad, awe, ta arebatador. Bo economia ta bay bon, pero no comete exceso. E ta bon considera den bo posicion di trabao. Disfruta di e energia ey cu bo ta posee. Number di suerte: 45, 21, 9.

**Virgo**  
Romanticismo lo reina den bo curason. Parti di bo presupuesto bo lo inverti den un biahe inespera. No nenga di siña cos nobo na trabao. Stress lo manifesta den forma di

dolor di cabes. Number di suerte: 25, 78, 4.

**Libra**  
Un hende hopi interesa pa bo no sa con pa bisa bo. Sea cuidadoso cu bo placa, no ta momento pa riesga. Lo bo ricibi un oferta importante di trabao. Respeta bo oranan di soño of cansancio lo vence bo. Number di suerte: 49, 57, 5.

**Scorpio**  
E recuerdonan di amor pasa por haci bo sufri. Inverti den stockmarket, ta e momento pa tuma decision. Medita detenidamente e ofertanan prome cu bo cambia di trabao. Un malestar di caracter leve ta menasa. Number di suerte: 25, 58, 9.

**Sagitario**  
Dia seductor, no lo tin hende pa resisti bo. Momento di crecimiento economico lento, pero sigur. Bo hefenan lo por haci bo un bon oferta. Descansa te ora cu bo

recupera di e cansancio acumula. Number di suerte: 92, 95, 2.

**Capricornio**  
E condicionnan astral ta ideal pa felicidad. Si bo ta precipita den finansa, lo bo tin problema. Bo trabao ta rekeri un esfuerzo di bo parti. Salud lo compañia bo, disfruta di bida. Number di suerte: 29, 45, 8.

**Acuario**  
Den amor, mester duna pa ricibi. No haci inversion ariesga. Un etapa nobo laboral lo haya bo prepara. Pone mas interes pa reestablece, anima bo mes. Number di suerte: 65, 53, 5.

**Piscis**  
Bo pareha mester di bo sosten, no defraud'e. No tuma decision economico a la lihera. Colabora cu bo compañeronan y tur cos lo ta mas agradabel. Bo ta mas fuerte cu eik, asina ta no keha. Number di suerte: 25, 45, 7.

# CACHO RIBA CAYA A MORDE FERROZMENTE UN PEATON DEN PINDASTRAAT



Dialuna atardi a drenta informe di cu un cacho a ataca un peaton den Pindastraat y e ta herida, mesora a dirigi tanto polis como ambulans na e sitio.

Na yegada di e patruya a bin compronde cu aki ta trata di e mesun cacho di caya cu ya caba a ataca 5 persona recientemente y awor a ataca un otro



persona ferozmente. Na yegada di e ambulans nan a atende e victima y

a transporte pa hospital. Polis a busca un solucion pa asina ningun hende

mas bira victima di e cacho ey cu ta sali riba caya ataca hende.



Prome Minister Evelyn Wever-Croes:

# PROME MINISTER A ELABORA RIBA E CARTERA DI ORGANISACION GUBERNAMENTAL DURANTE PRESENTACION DI E RELATO ANUAL 2023



ORANJESTAD – Prome Minister Evelyn Wever-Croes durante e Conferencia di Prensa di Gobierno di Aruba, a presenta e Relato Anual 2023 di su ministerio di Asuntonan General,

Innovacion, Organisacion Gubernamental, Infraestructura y Planificacion Teritorial na unda den 4 capitulo e ta elabora riba cada ministerio. Den e di tres capitulo Prome

Minister ta elabora riba e ministerio di Organisacion Gubernamental cu ta un parti hopi importante di su ministerio. Bou e capitulo aki ta cay:

Departamento di Recurso Humano (DRH): Aki e Relato Anual ta muestra un informe amplio di e trabounan di aña 2023 y hopi importante pa remarca ta cu aki ta refleha con e cantidad di personal ta bahando y consecuentemente tambe e gastonan di personal ta bahando.

Bureau Interne Diensten (BID): Esaki ta curason di Gobierno y ta esun cu ta duna e servicjonan interno, e magazijn pa

henter Gobierno y e Relato Anual ta muestra logronan impresionante.

Dienst Burgerlijke Stand en Bevolkingsregister (DBSB/CENSO): Den e paragraf aki por lesa riba tur e trabounan y logronan di Censo na 2023. Un logro grandi y di elogia ta cu segun un estudio por mira cu Censo ta logra atende su bishitantenan den menos di 7 minuut di tempo.

Hulpbestuurskantor (HBK): Aki ta refleha e cifranan a base di transaccionnan haci entre otro di Censo, WEB, Elmar y SETAR.

Het Bureau Multi Functionele Accomodaties

(MFA's): E bureau aki ta maneha e 4 edificionan di MFA na Noord, Paradera, San Nicolas y Santa Cruz.

Prome Minister ta invita e pueblo di Aruba pa lesa e Relato Anual 2023 completo y asina keda bon informa riba tur e logronan y trabounan di su ministerio di Asuntonan General, Innovacion, Organisacion Gubernamental, Infraestructura y Planificacion Teritorial.

Esaki ta posibel riba e Facebook di Gabinete Wever Croes, riba website di BUVO of via e plataforma di issuu: <https://issuu.com/>

## LOTTO TA INTRODUCI UN MIEMBRO NOBO DI INSTACASH “BUCKETS OF CASH”!

ORANJESTAD – Diabierna 10 di mei, Lotto, e loteria di Aruba, ta contento di por anuncia un integrante nobo “Buckets of Cash” den e famia di Instacash cu lo duna bo e oportunidad pa gana placa cash al instante!

Abo ta cla pa gana placa instantaneamente y no mester warda pa sorteo? Desde dialuna awo, 13 di mei Lotto lo trece un adicon mas na e famia di Instacash cu ta yama Buckets of Cash.

E wega di Buckets of Cash

ta costa solamente 3 florin cu lo tin diferente premio cash y bo por gana te cu Afl. 6.000,-!

Con pa hunga? Bishita bo rebendedo di Lotto preferi y pidi pa bo Buckets of Cash di Instacash desde dialuna awo. Ora bo cumpra ewega di Buckets of Cash, bo ta ricibi un ticket for di bo rebendedo preferi. Riba e ticket bo ta wak diferente hemchi cu placa y riba cada un tin 2 number. Match cualkier dos (2) di bo numbertan ganado cu e numbertan den e

mesun hemchi y gana e premio den e hemchi cu bo a match. Cada hemchi ta wordo hunga separa.

Instacash ta dunabo e oportunidad pa hunga bo weganan preferi manera 5X The Cash, 10X The Cash, 20X The Cash, Bingo, Money Tree, Match for Cash, Gold Mine, Hot Numbers, e famia di Instant Jackpot, Tic Tac Cash, Shooting Star y awo Buckets of Cash cu ta dunabo e chens pa gana placa al instante!

Lotto, E Loteria di Aruba



tin diferente wega, Catochi, Big 4, 1-OFF, Zodiac, Wega di Number di Korsou di Lotto, Lucky 3, Multi-X, Lotto di Dia, Lotto 5, Mini Mega y cu su Mega Plus y e diferente weganan di Raspa y Gana y Instacash. Cumprando

Lotto bo ta contribui na deporte riba nos isla. E meta ta pa organisa loteria, cambia bida di su hungadonan y na mes momento inverti den deporte local pa medio di donacionnan na e comision di subsidio.



## POLIS Y AMBULANS A BAY PA UN ACCIDENTE CU UN MOTOCICLISTA HERIDA NA SANTA CRUZ



Diamars atardi a drenta informe di un accidente cu hende herida na Santa Cruz, mesora a dirigi tanto polis como ambulans na e sitio. Na yegada di e patruya a bin compronde cu aki ta trata di un accidente entre un auto y un

motociclista unda un brommer no a mira un auto tras di un van y a subi caminda y dal den porta di e Toyota Vitz blanco. Debi na e caida e motociclista a resulta herida. Na yegada di e ambulans nan a atende e victima.

## CHAUFFEUR NO A REGULA SU VELOCIDAD NI A MANTENE DISTANCIA A BAY DAL TRAS DI UN AUTO PARIBA DI CAYENA MALL



Dialuna atardi a drenta informe di un accidente pariba di Cayena Mall, mesora a dirigi un patruya na e sitio. Na

yegada di e patruya a bin compronde cu aki ta trata di un accidente unda cu e chauffeur no a regula su velocidad ni mantene

distancia a bay dal tras di e auto su dilanti. Afortunadamente ningun hende a resulta herida.



**TA BUSCA PARTIDORA DI**

**CORANT PA AREA DI**

Simon Antonio - Pos Chikito

Brazil - Sanicolas

**HORARIO: 7.30 PM**

Contact: 585-9500

E-mail: [solodipueblo@gmail.com](mailto:solodipueblo@gmail.com)



# FORTALEZA PA FAMILIA

Scirbi pa Pastor Marcel Balootje

## TENE CUENTA NOS CURPA TA TEMPEL DI SPIRITO SANTO

E curpa cu nos tin no ta di nos mes, e ta di Dios, pasobra ta Dios a forma nos den barica di nos mama, y ningun hende a forma nan mes.

Locual hende ta bisa cu ningun hende tin nada di bisami kico mi ta haci cu mi curpa, ta algo cu ta demostra lo siguiente:

\*Un mente cu tin falta di conocemento di e palabra di Dios.

\*Un boca rebelde.

\*Un persona cu no a haña ta necesario pa reconoce Dios, den su bida ( Romanonan 1:28-32.)

Tambe e tin hopi di demostra e tempo trabahoso cu nos ta bibando aden ( 2 Timoteo 3:1-5).

Nos curpa ta algo di gran balar, pasobra e Spirito di Dios ta biba den nos.

Ta pesey ora hende mete cu bruheria, idolatria, y santeria, hende su mentalidad ta cambia pasobra nan a contamina, locual Dios a traha puro, limpi y berdadero.

1 Corintionan 3:16-19 ta para scirbi: Bo so no sa cu boso ta e tempel di Dios, y cu e Spirito di Dios ta biba den boso? Si un hende destrui e tempel di Dios, Dios lo destrui e. Pasobra e tempel di Dios ta santo, y esey ta loke boso ta.

Awor tene cuenta cuanto hende ta destrui nan mes cu;  
Adicion na Droga.  
Adiccion na Alcohol  
Adulterio y Fornicacion  
Inmoralidad/  
Homosexualismo  
Lesbianismo.  
Transgender.

Orguyo

Arogancia

Materialismo

Tur esey ta sosode ora hende dicidi cu ta nan ta manda riba nan curpa, y no kier haci locual Dios ta bisa. Hopi biaha nos ta mira hende bunita pafo, pero paden nan tin dolor y nan mente ta hopi confundi.

Den 1 Corintionan 6:18-20 e palabra di Dios ta bolbe splica atrobe: Huy for di tur inmoralidad. Tur otro pica cu un hende comete ta pafor di e curpa. Ma e hende immoral ta peca contra su mes curpa. Of boso no sa cu boso curpa ta e tempel di Spirito Santo kende ta den boso. Kende boso tin di Dios, y cu boso no ta pertenece na boso mes. Pasobra boso a wordo cumpra pa un preis; pesey glorifica Dios den boso curpa.

E asunto aki nos tin di comprende bon pa asina reconoce nos identidad den Cristo Hesus, caminda nos a wordo traha segun imagen y semehansa di Dios.



Y laga nos haci tur locual ta posibel pa lanta nan den e caminda di Dios manera Efesionan 6:1-4.

E tempo no ta facil, pesey e esfuerso ta necesario, especialmente awor cu nos ta mira cu inmoralidad y abominacion kier domina mundo henter.

Awor mas cu nunca nos oracion mester ta constant, y no lubida ayuno y lesamento di palabra, y no keda sin congrega, pasobra e forsa spiritual ta necesario pa nos tur.

Dios no kier pa ningun hende bay perdi, pero pa tur por yega na bida eterna den Cristo Hesus.

Dicidi awor pa Señor.

Sinceramente,  
Pastor Marcel Balootje.

## VWS SLUIT TIJDELIJK CONTRACT MET MEDICAIR VOOR AIR AMBULANCE TUSSEN CARIBISCH NEDERLAND, CURAÇAO

Het Ministerie van Volksgezondheid Welzijn en Sport (VWS) heeft kennisgenomen van de problemen en groeiende bezorgdheid over de code rood vluchten (air ambulance) in Caribisch Nederland. VWS heeft in overleg met Fundashon Mariadal (FM) de volgende voorzieningen getroffen.

Om de connectiviteit van air ambulance tussen Caribisch Nederland, Curaçao en Aruba te waar-

borgen heeft VWS een contract afgesloten met Medicaire (vooralsnog voor 2 maanden). Hiermee neemt VWS tijdelijk de contractuele verantwoordelijkheid op zich voor de beschikbaarheid van een air ambulance voor de verzekerden van Caribisch Nederland richting Curaçao en Aruba, die 24/7 beschikbaar is. FM zal medisch personeel beschikbaar stellen voor code roodvluchten met Medicaire. Intussen staat de Learjet van

Medicaire gestationeerd op Bonaire. Sarpa zal ambulancevluchten naar Colombia blijven uitvoeren.

Om uit de huidige impasse te komen heeft VWS besloten om op korte termijn een onderzoek te laten verrichten naar de ontstane problemen en om te komen tot een duurzame oplossing voor ambulancevluchten tussen de Curaçao, Aruba, Sint Maarten en Caribisch Nederland

**OLIVE TREE'S  
PRE-PAID  
FUNERAL PLAN**

**PAY AS YOU CAN**

Piedraplat ☎ 582 0000  
Sanicolaas ☎ 584 8888 | 5820000  
Habri dialuna pa diabierna | 8:00am-4:00pm

Olive Tree Social Department ☎ (+297) 743 7411  
www.olivetreefuneralhome.com



# DILANTI WELL DONE SUPER-MARKET UN CHAUFFEUR A REVERSE BAY DAL TRUCK STACIO-

Dialuna merdia a drenta informe di un accidente dilanti di Well Done Supermarket na Santa Cruz,

mesora a dirigi un patruya na e sitio. Na yegada di e patruya a bin compronde cu e chauffeur di e Hyun-

dai Getz a reverse y a bay dal e truck. Afortunadamente no tabata tin hende herida.



ORANJESTAD - Diahuebs mainta, Prome Minister Evelyn Wever-Croes a presenta durante un conferencia di prensa di Gobierno, e Relato Anual (Jaarverslag) di su ministerio pa aña 2023. Un di e topiconan cu Prome Minister a cubri e mainta aki, tabata innovacion.


Prome Minister a splica cu pa cu e topico aki den e Relato Anual tin 3 paragraf di cual cada un ta cubri e 3 institucionan cu ta atende cu innovacion den su ministerio. E institucionan aki ta: Aruba Futura Foundation, Directie Informatie Voorzieningen Automatisering (DIA), y Directie voor Innovatie. 1 Aruba Futura Foundation Futura ta un fundacion cu a wordo lanta pa implementa e vision di innovacion na Aruba. Futura tabata tin varios proyecto bou di su encargo di cual Edutech ta esun cu mas a resalta. E proyecto di Edutech ta ofrece scolnan e oportunidad di gana fondo pa asina por cumpli cu e proyectonan innovativo

## Prome Minister Evelyn Wever-Croes PROYECTONAN DI INNOVACION LO SIGUI TA UN PRIORIDAD PA GABINETE WEVER-CROES II

- cu nan a diseña.
2. Directie Informatie Voorzieningen Automatisering(DIA) E departamento aki ta encarga cu automatizacion di Aruba en general. Den e relato anual tambe ta haya informacion di kico tur a wordo haci cu e departamento aki.
  3. Directie voor Innovatie Prome Minister a indica cu e departamento aki ta uno nobo, y cu a wordo instituti pa atende cu innovacion.

Manera ta conoci, innovacion ta e futuro di nos muchanan y ta di gran importancia, pa sigui ofrece nan e medionan necesario pa engrandece nan conocimiento den e area aki. Gabinete Wever-Croes tin e compromiso pa sigui bin cu proyectonan innovativo, yudando asina e futuro generacion pa tin e conocimiento necesario pa den futuro por subi e mercado laboral exitosamente.

Pa mas informacion di e Relato Anual 2023 por click: [https://issuu.com/gabinetewevercroesaruba/docs/jaarverslag\\_algemene\\_zaken\\_2023](https://issuu.com/gabinetewevercroesaruba/docs/jaarverslag_algemene_zaken_2023)



8								
		3	6					
	7			9		2		
	5				7			
				4	5	7		
			1				3	
		1					6	8
		8	5				1	
	9					4		

		8		3		5	4	
3			4		7	9		
4	1				8			2
	4	3	5		2		6	
5								8
	6		3		9	4	1	
1			8				2	7
		5	6		3			4
	2	9		7		8		

Paardenbaaistraat 10, Oranjestad, Aruba Tel.: (297) 525 - 7555  
www.lottoaruba.com

Resultado : Sorteo 8 Mei 2024 Merdia

<p>Sorteo # 4260</p> <p>0451</p> <p>8230</p> <p>6098</p> <p>X2</p>	<p>Sorteo #</p> <p>0 x Jackpot</p> <p>0 x Match 4+</p> <p>0 x Match 4</p> <p>0 x Afl 12.00</p> <p><b>260.000,-</b></p>
<p>Sorteo # 4260</p> <p>2256</p> <p>X2</p>	<p>Sorteo #</p> <p>0 x Jackpot</p> <p>0 x Match 4</p> <p>0 x Afl 8.00</p> <p><b>56.000,-</b></p>
<p>Sorteo # 2316</p> <p>3488</p>	<p>Sorteo #</p> <p>0 x Jackpot</p> <p>0 x match 4</p> <p>0 x Afl 500.00</p> <p>0 x Afl 50.00</p> <p>0 x Afl 15.00</p> <p><b>460.000,-</b></p>
<p>Sorteo # 4260</p> <p>9756</p> <p>Libra</p>	<p><b>Afl. 610.000,-</b></p>
<p>Sorteo # 1134</p> <p>011</p> <p>X2</p>	<p>Sorteo #</p>



# FUNDACION SCOL TEATRO ARUBA TRIBI: TRIBI DI EXPLORA Y DESAROYA BO TAL-



ORANJESTAD, 7 mei 2024: Diamars atardi den un conferencia di prensa hopi ameno mr. Daylan Krozendijk conhuntamente cu sra. Joan Danies a informa cu Aruba tin un Scol di Teatro nobo: "Fundacion Scol Teatro Aruba: TRIBI".

Di unda e idea a nace? Tribi ta e prome scol di Teatro na y pa Aruba. E idea a nace despues cu Prins Bernard Cultuurfonds Caribisch Gebied (PBCCG) a pidi Jeugdtheaterschool Drazans di Cu-

raçao pa haci un sondeo di e situacion di teatro na Aruba. Asina nan a bin cu nan prome proyecto na Aruba cual tawata 20 Hours of Theatre. Eynan Daylan Krozendijk a bin den contacto cu Drazans y a cuminsa un colaboracion unda cu hasta Curaçao a bay cu algun hoben pa participa na e proyecto di Drazans 'Week Zonder Naam Curaçao 2023'. Y ta na Curaçao e combersacionnan a cuminsa for di un iniciativa di Daylan pa por cuminsa cu un scol di Teatro na Aruba mes y

awe cu orguyo nos por introduci na pueblo di Aruba TRIBI.

Ken ta e cara nan di TRIBI?

Daylan Krozendijk ta un hoben profesional cu pasion pa Teatro y a studia Docente di teatro na Hogeschool voor de Kunsten Utrecht na Hulanda. Despues di a completa su estudio, el a bin di biaha Aruba unda cu desde 2019 e ta fungiendo como Docente di Drama na Instituto Pedagogico Arubano (IPA) dunando lesnan di drama na e futuro maestronan di scol primario na Aruba.

Joan Danies no ta desconoci den e mundo teatral aki na Aruba. Joan ta 2e graads CKV-docent cu specialisacion den teatro. Desde 2008 e ta trahando na EPI como CKV-docent dunando les den tur disciplina di Arte, pero cu un enfasis y afinidad special pa teatro. Apesar di esey Joan tin un trayectoria largo den e mundo di teatro y cu diferente reconocemen-

to pa su aporte na cultura.

Prome salida di TRIBI

E meta principal ta pa e hoben por desaroya su mes riba e disciplina aki. Den e disciplina di teatro e hoben ta siña expresa su mes y esaki ta algo hopi importante no solamente como artista pero sigur tambe como individuo. Pa cuminsa cu esaki nos ta cuminsa cu TRIBI su prome proyecto: The Theatre Warm Up. E proyecto aki ta pa mucha 9 pa 12 aña y hobennan entre 13 cu 18 aña cu ta curioso pa explora e mundo teatral. Den un total di 9 les cu lo tuma lugar tur diasabra cuminsando 18 di mei e alumnonan lo sera conoci cu diferente tecnica di actuacion. Pensa riba uzo di bos, uzo di curpa, tecnica di lus, diferente formanan di teatro manera comedia,

tragedia, teatro absurdo y mas.

Pa culmina e serie di lesnan aki e studiantenan hunto lo traha riba un presentacion final pa presenta dia 6 di juni anochi. Si bo conoce un mucha of hoben cu ta interesa den explora e mundo di teatro, comparti e informacion cun'e! E participacion tin un costo di 150 florin pa participante y lo tuma lugar na Cueba di Mascaruba na Dominicanessenstraat 12.

Pa mas informacion por haya nan riba Facebook y Instagram bou TRIBI Aruba of por manda un mail na [info@tribiaruba.com](mailto:info@tribiaruba.com) A finalisa bisando: "Nos ta invita tur mucha y hoben pa TRIBI di join nos warm up, TRIBI di explora bo talento, TRIBI di comparti bo creatividad!".

## Clasificados

🚗
🏠
🛒
🚚
🔧
👤



**SOLODIPUEBLO@GMAIL.COM**

**CEL. 585 9500**






## THE THEATRE WARM-UP!

Les di Teatro pa mucha y hoben.

**Fecha**

Mei	18	25
Juni	1	8 15 22 29
Juli	5	6

**Orario**

Grupo di mucha	9:00-10:30
Grupo di hoben	10:45-12:15

**Edad**

9-12 13-18

**Lugar**

Cueba di Mascaruba, Dominicanessenstraat #12

**Prijn** Arf 150,- PP

**Contacto:**

5630298 of 5621717

**Inscripcion:**

[info@tribiaruba.com](mailto:info@tribiaruba.com)





# CON PA CUIDA BO SALUD MENTAL STRATEGIA PA BIENESTAR INTEGRAL



Den un mundo yen di demanda- y retonan constante, cuida nos salud mental ta fundamental pa nos bienestar general. Salud mental no ta trata solamente di e ausencia di trastornonan mental, pero tambe di cultiva un mente

balansa y resiliente cu por enfrenta e altibahonan di bida cu gracia y fortaleza. Den e articulo aki, nos lo explora diferente strategianan pa cuida bo salud mental y promove un bienestar integral.

**Practica cuido propio**  
Cuido propio ta esencial pa mantene un balans emocional. Dedicar tempo tur dia na actividadnan cu ta trece alegria y relacion, sea practica yoga, lesa un bon buki, bay un paseo den naturalesa of simplemente descansa.

**Establece limitenan saludabel**  
Siña bisa "no" ora ta necesario y establece limitenan cla den bo relacionnan y responsabilidadnan. Respeta bo mes necesidadnan i prioridadnan ta fundamental pa mantene bo salud mental den bon estado.

**Promove relacionnan positivo**  
Cultiva relacionnan saludabel y di apoyo cu amigonan, famia y sernan ker. Conexion social ta vital pa bienestar emocional, p'esey ta busca actividad- y gruponan cu ta permiti



bo conecta cu otro mun manera significativa.

**Practica gratitud**  
Fomenta un actitud di gratitud dor di practica e aprecio diario di e cosnan bon di bida. Mantene un diario di gratitud of simplemente tuma algun momento cada dia pa refleha riba e bendicionnan den bo bida por tin un impacto positivo riba bo bienestar mental.

**Mantene un estilo di bida saludabel**  
Cuida bo curpa dor di un cuminda balansa, ehercicio regular y suficiente sosiego. Bienestar fisico y mental ta estrechamente relaciona, p'esey cuida bo curpa ta fundamental pa mantene un mente saludabel.

**Practica di atencion completo (mindfulness)**  
Atencion completo ta un practica cu ta encera prestacion di tension consciente na e momento presente sin husga. Meditacion, respiracion consciente y otro tecniconan di atencion completo por yuda bo reduci stress, aumenta claridad mental y mehora bo bienestar emocional.

**Busca yudansa profesional ora ta necesario**  
No tene miedo di busca yudansa profesional si bo ta sinti cu bo ta bringa cu bo salud mental. Terapista, consehero- y psikiatranan ta capacita pa ofrece sosten y tratamiento pa un

variedad di problema di salud mental, di stress y ansiedad te cu depresion y un trastorno di come.

**Desconecta for di rednan social**  
Aunke e rednan social por ta un herment util pa keda conecta, nan por ta tambe un fuente di stress y comparacion constante. Tuma descanso regular di rednan social y pone limite riba nan uzo pa proteha bo salud mental.

**Practica resiliencia emocional**  
Resiliencia ta e capacidad pa recupera for di diversidad y mantene un sentido di forsa interno contra e retonan di bida. E ta cultiva resiliencia dor di practica aceptacion, optimismo y adaptabilidad den situacionnan dificil.


**Cuida bo salud mental ta un acto di amor propio**  
Corda cu cuida bo salud mental ta un acto di amor propio y un inversion den bo bienestar a largo plaso. Priorisa bo salud mental y ta busca activamente forman pa cultiva un mente saludabel y balansa den bo bida diario.

Den resumen, cuida bo salud mental ta fundamental pa bo bienestar integral. Incorpora e strategianan aki den bo bida diario y ta haci auto-cuido un prioridad. Fortaleciendo bo salud mental, lo bo ta mas ekipa pa enfrenta e retonan di bida cu calma, claridad y resiliencia.





**CAMARA DI SEGURIDAD  
A CAPTA AUTO CU A HIT &  
RUN DEN PARKINGLOT DI  
HOTZONE NA PALM BEACH**



Diamars anochi a drenta informe di un accidente den e parkinglot di e hotzone na Palm Beach, mesora a dirigi un patruya na e sitio. Na yegada di e patruya a bin compronde cu aki ta trata di un accidente hit & run

unda un auto a dal esun staciona y a sigi core bay manera nada a pasa. Afortunadamente un di e camaranan ta na e angulo unda e accidente a sosode y polis di trafico a presenta pa asina e bay tras di e chauffeur aki.

Laga tur loke ta spera mi ta bunita  
Laga tur locual cu mi encontra na caminda ta bunita  
Laga tur locual cu mi laga atras keda bunita y  
Laga esakinan termina den tur buniteza.

Autor: Cado Wever.

Cu inmenso dolor na nos curason, nos ta anuncia fayecimento di nos ser stima:

**Lurbia Maria Maduro**

Cariñosamente yama: “Lulu of Mamita”

\*11-12-1927 - †27-04-2024

Vda. di Tyberth Linsay cu a wordo entera cu honor  
Militar na Arlington USA.



Ex empleada di Telefoondienst +/- 1947  
Ex empleada di Openbare Bibliotheek na Wilhelminastraat 1958-1960  
Ex empleada di Bestuurskantoor voormalige archief & registratie nu bureau BID +/- 1961-1974  
Ex empleada di Instituut Coudewater gemeente Rosmalen  
Ex empleada di Arbeidsbureau Veghel Ned.  
Ex empleada Mgr. Zwijsencollege Veghel Ned.  
Ex empleada W.V.E.O Veghel Ned.  
Na nomber di su yiunan:  
Hermine Linsay  
John Linsay y famia na Hulanda  
Nieta y nieto: Jessica Linsay y George Linsay  
Sobrina(o)nan: Rosa Wever y famia / Louisa Wever  
Francis Wever y famia  
Omar Maduro  
Nectali Maduro  
Margarita Maduro  
Sobrina stima: Carmen Maduro  
Sobre sobrina(o)nan:  
Aimeé Robert y Jay Lovell yiu Zenny-Ann Henriquez  
Ismay Robert y yiu Zayden Briesen  
Joel Geerman y Miloushka Trimon y yiu Kaëly Geerman  
Richnelda y Joathan Kock Vries y yiunan Jahziënne Kock y Jahlainey Kock  
Jaylene Vries y Marshall Petronilia y yiu Xaithyël Petronilia  
Manera su nieto: Ramsey y Giselle Acosta y famia  
Aldwin Acosta y famia

Zuster Jacoba Dirks-Krozendijk y famia

Comper y comer: Edgard Boekhoudt y Louisa Hart y famia  
Fabio y Editha Croes-Maduro y famia  
Iha: Judith Croes  
Franklin Krosendijk

Ayudante di cas: Ana Antonia Del Rosario Gomez  
Marietje Pestano de Agrela y Freddy Rosina  
Fabiola y Chis  
Prima(o)nan: Ros y casa Vis-Croes y famia  
Betty Harms y famia  
Edwin Angela y famia  
Wit Gele Kruis: Janin Godoy-van Hooft, Rachel, Myléne, Sandra, Magaly, Sharine, Lourdes, Liesbeth y Sharléne.


Demas famia: Maduro, Linsay, Hanief, Khan, Laclé, Vries, Kock, Wever, Robert, Petronilia, Acosta, Dirks, Krozendijk, Boekhoudt, Hart, Croes, Geerman, Pestano de Agrela, Rosilo, de Kort, Henriquez  
Ta invita pa acto di entierro cual lo tuma lugar na Aurora Funeral Home diasabra 11 di mei 2024 di 2’or pa 4’or di atardi. Despues lo sali pa Santana Catolico na Paradera.

Nos disculpa si den nos tristesa nos por a lubida algun famia of conocir.





WWW.SOLODIPUEBLO.COM



SOLODIPUEBLO@GMAIL.COM

## LEY DI MATRIMONIO A KEDA EMPATA 10-10

Mansur tuma vengansa contra  
Dowers pa su voto

**DEN E PACTO DI GOBIERNO DI AVP  
ACCION 21 PA FUTURO GOBIERNO,  
DOWERS NO POR TA MINISTER DI  
HUSTICIA**



Shailiny Tromp-Lee  
a abstene: E no ta cla



## TIROTEO NA MEIVELD: HOMBER CU A RICIBI BALA A CORE SU MES AUTO BAY HOSPITAL



Diahuebs atardi den careda di 4.30 a sosode un tiramento of tiroteo na altura di Meiveld. Aki un homber a keda alansa pa bala. E mes como chofer di auto a core su auto dirigiendo su mes na hospital pa ricibi promer ayudo. Na Hospital su auto a keda confisca y a haya un arma tambe den su auto. Mientrastanto na Meiveld tin mas investigacion tumando lugar pa mira ken mas ta involvi. E victima a yega hospital den un Kia Serato bruin. Tambe tin un Honda Fit shinishi involvi. E persona den e Kia Cerato a saca un arma color nikkel y a los tiro. E persona den Honda Fit tambe a saca arma y los tiro dirigi riba e victima cu a alcansa e victima den lomba. Esaki a produci hopi sanger den e auto Kia Cerato. E caso ta bao investigacion.

**AUTORNAN DI LEY DI  
MATRIMONIO NO TABATA TIN  
SPLICACION Y A CONTESTA;  
"BAY PUNTRA  
GOOGLE"**





# Shailiny Tromp-Lee a Abstene!

## DIARANSON ANOCHI, PARLAMENTARIO DI MEP SHAILINY TROMP LEE A ABSTENE DI VOTA ESAKI A BIRA NOTICIA DI E MOMENTO

E parlamentarario a splica su postura den un comunicado:

Den mi 7 aña den Parlamento ta mi prome biaha cu mi ta abstene y mi kier pa boso sa cu mi abstencion tabata mi decision. Pero Shailiny, pakico bo a abstene? Dicon no tuma un decision? Mi kier tuma e espacio pa mi ta sincero cu boso y pa mi comparti mi sentimentonan "curu". E ley aki desde un principio tabata hopi dificil pa mi.

Un debate interno basta pisa a tuma y ta tumando lugar ainda. Mi ta memey. Memey paso mi ta compronde y mi ta sinti pa tur dos banda. Di cas mi ta hopi religioso y esaki ta un fundeshi fuerte di mi fe, mi paz y mi estabilidad. Diariamente mi a y ta bati na porta di Papa Dios pa gradici y pidi. Den mi bida mi a pidie pa E haci milager y obra den salud di mi yiu y mi casa. Mi a bib'e di cerca. Dios a haci e milager den mi bida, el a

sana mi yiu y mi casa.

Di otro banda mi ta sinti pa e dicho amor ta amor. Mi no ta sinti ta na ami pa dicidi ken si of ken no. No ta na ami pa stroba felicidad di otro. Ken ami ta pa husga amor? Ami ta convenci cu mi Dios ta un Dios di amor. Mi dilema ta grandi y mi debate interno ta fuerte.

Den mi trayectoria di bida ami semper tin mi opinion, por argument'e y present'e. Echo ta, cu pa e



topico aki esey ainda no ta e caso.

## AUTORNAN DI LEY DI MATRIMONIO NO TABATA TIN SPLICACION Y A CONTESTA; "BAY PUNTRA GOOGLE"

E ley di matrimonio di mes sexo no tabata un ley cu base solido y investigacion concreto.

Tabata mas bien un grito pa complace e gusto pa "casa". Varios pregunta riba e ley no a wordo contesta.

Mas remarcabel ta cu

hasta a duna como contesta: Bay puntra Google. Pues esey a cay masha malo pero na mes momento a trece dilanti cu e autornan di e ley no tin ningun estudio di impacto y consecuencia.

Pa presenta un ley, bo mester a studia tur

detaye profundamente y percura pa tin contesta riba tur pregunta.

Unaves cu bo no tin contesta, ta trece duda. Pasa ley pa gusto of smaak of agenda di algun no ta responsabel.

**CAMBIA  
PERSPECTIVA TOCANTE  
OBESIDAD:  
SA BO NUMBER Y MIDI BO PESO**





# MANSUR TUMA VENGANSA CONTRA DOWERS PA SU VOTO:

Den e pacto di Gobierno di AVP - ACCION 21 pa futuro gobierno, Dowers no por ta minister di husticia

Despues di reunion di parlamento, Miguel Mansur tabata hopi rabia y hostina.

E tabata rabia cu Arthur Dowers kende a vota contra su ley.

El'a manda advertencia pa Avp, cu den un supuesto futuro gobierno entre Accion 21 y AVP, Arthur Dowers no por bira Minister di Husticia.

Esaki ta manera un reglamento di cuenta pa

e hecho cu Dowers a voto contra e ley.

Pacto:  
E declaracion aki cu tabata den un momento di rabia di Mansur, parce Mansur a papia su lenga voorbij, papiando riba e pacto secreto entre Avp y Accion 21 pa forma gobierno den futuro.

Mas cu claro cu esaki ta un baño di awa frieuw pa comunidad cu no tabata sa cu Avp a cera pacto cu Mansur.



## LEY DI MATRIMONIO A KEDA EMPATA 10-10

Diaranson mainta 9.or a inicia e reunion pa trata e ley di Mansur y Misha Raymond pa legalisa matrimonio di mes sexo.

Despues di varios ora di debate a yega na votacion pasa di 9or di anochi. E votacion a termina 10 na favor, 10 contra y 1 parlamentario a abstene.

Cu empate aki, e ley no a pasa y awor mester wordo yama den 30 dia pa bolbe wordo vota. (8 juni 2024)

Mientrastanto ta enespra di veredicto di corte di casacion. Cu tambe por tin su influencia depende e resultado.

Hightlights di e reunion ta cu Dowers y Eman a vota contra, mientras cu di Mep, Setty Christiaans Yarsagaray a motiva di lo vota na favor pa sostene su ruman. Shailiny Tromp Lee a abstene di vota, pa cual ela splica cu e no por a haya su mes ainda den e dilemna aki.

Marisol Tromp den su discurso no a papia nada di e ley, pero tabata zundra riba e votacion, exige pa parlamento vota.

Un ley di matrimonio cu no por a produci ningun contesta, pasobra Misha Raymond a manda parlamentario pa bay google.

Ningun estudio di impacto ni nada.

Kico awor?

Awor mester laga e barco sigui nabega, sperando casacion pa djey spera e reunion wordo yama atrobe.

## VOTONAN DI LEY DI MATRIMONIO: 10 votonan contra ta:

Hendrik Tèvreden MEP  
Marco Berlis - MEP  
Ricky Hoek - MEP

Darlaine Erasmus - MEP  
Alvin Molina - MEP  
Rycond Santos - Independiente

Edgard Vrolijk Pres. - MEP  
Arthur Vallejo - MEP  
Arthur Dowers - AVP

Mike Eman - AVP  
Abstencion: Shailiny Tromp Lee

## 10 votonan nan PRO ta:

Miguel Mansur - A21  
Misha Raymond Raiz  
Raymond Kamperveen

Raiz  
Marisol Tromp - Mas  
Aguanette Gunn - Mas

Gerlien  
- independiente  
Mervin Wyatt Ras- Avp

Croes  
Mike De meza - Avp  
Benny Sevinger Avp  
Setty Yarsagaray- MEP



Minister Rocco Tjon:

# FADA Y ARUBABANK CU CONFERENCIA EXITOSO PA CU SALUD MENTAL “MIND MATTERS”



ORANJESTAD - Diamars anochi, a tene e conferencia “Mind Matters” organisa pa Fundacion Anti Droga Aruba (FADA) y ArubaBank, den cuadro di salud mental, cual ta un topico sumamente importante. Salud mental no ta solamente brinda e cuido na tur esnan cu tin mester di esaki, tampoco e ta solamente e parti di diagnostica, pero e ta hopi importante pa kibra e taboo, pa crea comprension y brinda sosten pa di e forma aki, esnan cu tin mester di e cuido aki, sinti nan mes confortabel suficiente pa busca e ayudo necesario.

Manera ta conoci, Ministerio di Husticia y Asuntonan Social conhuntamente cu demas stakeholders cu ta traha den e area di salud mental a bin ta tuma hopi pasonan concreto den e bon direccion pa cu salud mental. Esaki, no pa solamente e wordo adresa cu prioridad, pero pa esaki bira un derecho fundamental di cada

persona cu tin mester di e cuido aki.

Actualmente, nos ta conta cu e stuurgroep GGZ, cual a base di e stuurgroep aki, tur stakeholders ta sinta cada dos siman na mesa,

pa asina traha riba cada aspecto pa cu salud mental manera legislacion, financiamiento, desaroyo di cada profesional, pero tambe e parti di prevencion. FADA ta esun cu ta trek e parti



di prevencion, pa cual motibo a bin cu e iniciativa di e congreso di “Mind Matters”.

Como ministerio di Husticia y Asuntonan Social, e impacto cu salud mental tin riba individuo nan, riba nan famia y nos comunidad en general, ta algo cu sigur nos ta wak. Pa e motibo aki e ta asina importante pa organisa e tipo di conferencianan aki

pa por kibra e stigma.

Palabranan di pabien y gradicimento na e organisadornan, y tur stakeholder cu a aporta na e conferencia aki, pasobra ta e tipo di conferencianan aki ta loke ta yuda kibra e silencio, e stigma y e taboo. Na mes momento, nos ta anuncia, cu e segundo edicion di “Mind Matters” ta na caminda, cual lo ta na oktober binidero.





Prome Minister Evelyn Wever-Croes

# RELATO ANUAL 2023 TA DUNA SPLICACION EXTENSO RIBA E DIFERENTE DEPARTAMENTONAN BOU INFRASTRUCTURA Y PLANIFICACION

ORANJESTAD

Recientemente durante conferencia di prensa di Gobierno, Prome Minister Evelyn Wever-Croes a presenta e Relato Anual 2023 (Jaarverslag 2023), cu ta duna un bista riba tur e trabounan di Ministerio di Algemene Zaken cu a wordo haci durante aña 2023. Un di e topiconan cu a wordo cubri den e relato aki ta Infraestructura y Planificacion Teritorial, cu ta consisti di varios paragraf.

Den e prome paragraf cu ta cubri Directie Infrastructuur en Planning (DIP), ta duna un splicacion riba tur e retonan cu tin actualmente den e departamento aki, y di unda nan ta bin. Manera ta conoci, tin varios investigacion penal andando riba e diferente ministernan cu tabata tin infraestructura bou di nan encargo prome cu Gabinete Wever-Croes a drenta gobernacion. E



investigacionnan aki a paralisa e departamento, mirando cu tin varios personal di DIP cu ta na cas pendiente investigacion, causando asina cu e departamento tin un scarcedad na personal. Apesar di e situacion, den e relato

anual, por lesa tur loke DIP a logra den 2023. Den e siguiente paragrafnan e relato anual ta duna un splicacion extenso di e trabounan, cu apesar cu tin hopi reto andando, a wordo logra pa e departamentonan di Dienst Landmeetkundig

en Vastgoed Registratie (Kadaster), Dienst Openbare Werken (DOW), y Dienst voor Technische Inspectie (DTI). Prome Minister ta gradici tur departamento cu ta cay bou di Infraestructura y Planificacion Teritorial, pa nan trabou duro haci

durante 2023, apesar di reto, pa logra brinda miho servicio na nos comunidad. Den un siguiente conferencia di prensa, Prome Minister lo elabora mas di trabounan realisa y cu lo ta den planificacion pa wordo realisa.

## NA MACUARIMA CHAUFFEUR DI UN PICK-UP A SCUCHA SONIDO NA E WIEL Y ORA ELA BAY PARA ESAKI A REMENTA

Diamars atardi a drenta informe di un incidente na Macuarima, mesora a dirigi un patruya na e sitio. na yegada di e patruya a bin compronde cu aki ta trata di un incidente unda e chauffeur mientras e ta coriendo ela scucha un sonido di batimento na e wiel y ora ela bay para, e tire a rementa y causa daño.





# MINISTER XIOMARA MADURO TABATA PRESENTE NA “DIA DE LA GUAJIRIDAD” NA RIO HACHA, COLOMBIA DURANTE CUAL A OTORGA VARIOS RECONOCIMIENTO NA SR. RAMON TODD DANDARÉ



Recientemente riba Dia de la Guajiridad, Fundación Compartamos la Felicidad y InspirArte a organisa un evento "La Guajira en el Gran Caribe Diálogos sobre Aruba," na Centro Cultural di Banco di República na Riohacha, Colombia. Un actividad durante cual a destaca e lasonan historico, economico y cultural entre Guajira y Aruba. Minister di Cultura, Xiomara Maduro tabata presente riba invitacion di e organizacionnan organizado. E mandatario a tene un discurso den cual ela elabora riba e union entre La Guajira y Aruba.

Durante di e actividad aki, e organisadonan a entrega varios reconocimiento na e

linguista y Papiamentista, Sr. Ramon Todd Dandaré, pa su importante aporte na cultura, educacion, investigacion y conservacion di nos lenga materno Papiamento. Apesar cu el a bin mucha na Aruba, unda el a wordo lanta y educa, Sr. Todd Dandaré ta recorda su origen Guajiro den tur evento of conferencia local y internacional, unda semper e ta menciona su ciudad natal Riohacha. P'esey den cuadro di e celebracion di Dia di Guajiridad, e Asamblea Departamental di Guajira a otorga e condecoracion mas halto y importante di e Departamento di Guajira, Luis A. Robles Suarez na Sr. Todd Dandaré. Tambe e Consejo Distrital di

Riohacha a duna nan respectivo reconocimiento na Sr. Todd Dandaré. Ademas otro intancianan manera Fundación Teatro Aurora, Fundación Compartamos la Felicidad y Asociación Kojutajirawaa a honra e bida y obra di Todd Dandaré.

E mandatario ta informa cu e charla "Guajira en el Gran Caribe Diálogos sobre Aruba", a wordo duna pa e historiado y autor, Sr. Fredy González Zubiría, unda el a destaca diferente aspecto cu ta uni nan departamento cu nos isla. Otro orador sra. Katherin Pérez, Directora di e Programa Economica na Universidad di Guajira, kende a elabora entre otro riba e posibilidad economico entre ambos region.

Despues tabatin un panel cu participacion di sr. Fredy González, sr. Benjamin Romero, sra. Katherin Pérez y sr. Ramón Todd Dandaré. Sr. Romero a honra e memorianan di varios persona di origen Guajiro cu a establece na inicio di siglo pasa na Aruba y nan a haci di nos isla nan di dos patria. E moderado tabata e hurista, academico y promotor di e cultura Wayuu, sra. María Isabel Cabarcas kende ta directora ehecutivo di InspirArte. Na final Sr. Esteban Narváe kende ta gerente di Centro Cultural di Banco di Republica, a gradeci e participacion y aceptacion di e invitadonan y publico presente pa e evento aki por a bira uno exitoso.

E mandatario a gradici



e organisadonan pa e e invitacion y a felicita sr. Ramon Todd Dandaré pa tur e reconocimentonan cu ela ricibi. Minister Xiomara Maduro na

nombre di Gobierno y pueblo di Aruba a gradici sr. Ramon Todd Dandaré pa tur e trabounan cu e ta haci na bienestar di pais Aruba.





# MINISTER THIJSSEN A ASISTI NA RECEPCION DIA NACIONAL DI POLACO



Den Haag – Minister Plenipotenciario mr. Ady Thijsen a atende e recepcion na ocasion di Dia Nacional di Polaco. Minister Thijsen a felicita embahadora Margareta Kassangana

cu e celebracion di nan dia nacional.

Durante di e recepcion Minister Thijsen a haci uso di e oportunidad pa papia cu embahador di otro paisnan y asina

fortalesa su network den e mundo diplomatico na Den Haag.

Nota pa redaccion:

E potretnan ta cortesia di Arubahuis



## EXPOSICION JOLLY PAINTER

Jolly Painters ta presenta nan prome exposicion na biblioteca. Esaki ta habri dialuna dia 13 di mei pa 1 siman largo durante orario regular di biblioteca. Jolly painters ta un grupo di cuater amiga cu ta pinta hunto regularmente, disfrutando nan hobby. Nan ta Babs (Barbara) Kroonenberg, Adelaida Ponson, Elo Lee y Vivian Storm-Croes.

Cada un tin nan gusto/estilo diferente y esey por nota tambe den e obranan. Abstracto, naturaleza, colorido, romantico, fantasia.

Tambe tin mas obra di man manera boter decora. Pues basta articulo interesante pa admira.

Apertura di e exposicion ta



dialuna dia 13 di Mei 2024 di 6or pa 8or den sala di Exposicion na

Biblioteca Nacional Aruba. Esaki ta keda habri te cu diabierna

dia 24 di mei 2024. Publico ta bonbini.



# DIA MUNDIAL DI PARHANAN MIGRATORIO

## 2024: PROTECCION DI INSECTO TA PROTEHA PARHANAN

ORANJESTAD - E dia observa mundialmente yama 'World Migratory Bird Day' (WMBD) cu ta un campaña di dos biaha pa aña pa conscientisacion cu ta enfoca riba e necesidad di conservacion di parhanan migratorio y nan habitat. E meta ta pa alcanza efectividad di conscientisacion mundial di e retonan cu e parhanan migratorio ta encontra, nan importancia ecologico, y e necesidad di cooperacion internacional pa conserva nan.

Directie Natuur en Milieu (DNM) tambe ta duna un aporte local pa cu e dia observa aki. Manera nos tur sa, Aruba tambe ta anfitrión di e grupo di parhanan migratorio cu ta bishita nos pa descansa, recarga of tambe broei pa despues nan bay bek nan luga di origen. Den cuadro di esaki, DNM ta trece dilanti algun punto pa comunidad tene cuenta cu ne como tambe algun data cu ta pertenece na e tema cu ta enfoca e aña aki riba e importancia di insectonan pa e parhanan migratorio.

Tur aña, riba e di dos diasabra di luna di mei y esun di october ta observa e fecha mundial pa parhanan migratorio. Hendenan rond mundo ta tuma accion y ta organisa eventonan educacional publico, exhibicion y festival, evento di observacion di parhanan pa asina celebra WMBD. E aña aki e tema ta enfoca riba e importancia di insectonan. Pa prome biaha un campaña ta enfoca riba insectonan pa e parhanan migratorio y e menasa cu e poblacion di e insectonan ta encontra.

Insectonan ta fuente esencial di energia pa parhanan durante nan temporada di broei, viahe y nan migracion en general. E insectonan ta contene hopi nutriente y ta fuente di proteina pa parhanan migratorio. E parhanan tin necesidad di bon nutricion pa nan mes pero tambe pa nan duna di come na nan yiunan. Asina ta sigura existencia di diferente sorto di parhanan migratorio. E presencia di insectonan ta aporta grandemente na e momento di migracion di parhanan. Durante nan parada na diferente luga riba nan ruta, e parhanan ta busca insectonan den mondi, saliñanan of otro habitat. Tambe nan ta busca pa gara insectonan den aire of ta coba pa esakinan den troncon di vegetacion. Hopi biahe of migracion di parhanan ta coincide cu abundancia di insectonan na e localidad di descanso.

Migramiento di parhanan ta un fenomeno natural cu a bin ta captura imaginacion di hende di diferente cultura y decada. E biahe aki ta envolve movimiento masal di parhanan cu ta bula distancianan largo cu ta cubri continentenan, guia pa nan instinto, señalnan di medio ambiente, y tambe compañía cu strategia. E migracion ta un comportacion compleho cu ta sirbi propositonan ecologico, evolucionario y di sobrevivencia. Pero e migramento di parhanan ta un fenomeno bou menasa. Esaki ta particularmente pavia cu e poblacion di insecto, di cual e parhanan ta depende, ta bahando

drasticamente.

Akinan DNM ta inclui poco mensahenan importante di e interdependencia di insectonan cu e parhanan. Tin un urgencia pa cu accion pa e proteccion di insectonan.

- Presencia di insectonan ta influencia grandemente e tempo, duracion y exito general pa e migracion di parhanan. Durante e trayecto, parhanan ta para na diferente luga riba nan ruta. Nan ta busca pa insectonan den areanan di cosecha, mondi, saliñanan, 'wetlands' y otro habitat.

- Parhanan cu ta come insecto ta cubri un variedad diverso di insectonan den nan dieet. Esakinan ta inclui abeha, sangura, musca, bichi, barbulet, tor y tambe invertebra acuatico

manera e spirito di cabrito (tambe yama dopi dopi). P'esey no ta tur ora ta bon pa spuit cu insecticida. Parhanan cu ta come insecto ta yuda combati infestacion di insectonan cu por causa daño na cosecha of tambe combati plaga cu ta propaga malesa.

- 85% di matanan cu ta floria ta rekeri polinizacion y esaki hopi biaha ta trabou di insectonan. P'esey si nos perde e polinisantenan nos matanan lo lucha pa biba y tambe parhanan cu ta depende di nan.

- Mantencion y restauracion di areanan cu tin awa manera damnan, saliñanan y 'wetlands' ta esencial pa proteccion di e grupo di parhanan acuatico cu ta come insecto.

- Observacion y

monitoreo di parhanan migratorio uzando ciencia cu ta envolve participacion di hende ta yuda cu conscientisacion. Manera ken no ta corda e conteo nacional di parha, algo asina tambe por haci pa esunnan migratorio. Pa medio di campaña educacional di medio ambiente y naturalesa por duna data importante pa restaura y maneha habitatnan esencial cu ta beneficia y conecta parhanan migratorio.

DNM ta felicita un y tur cu e dia Mundial di parhanan migratorio 2024.

Ban para keto na e importancia di e diferente parhanan migratorio cu ta existi. No solamente pa admira nan pero pa reconoce nan importancia y cu nan ta depende di insectonan.







Horoscop pa 10 di mei 2024

Feliz y productivo diabierna. Awe Solo di Pueblo ta presenta bo horoscop pa dia 10 di mei 2024.

**Aries**  
E discusionnan familiar ta toca su fin. Si nan propone bo un inversion, analisa e riesgo. Bo por logra haya miho condicion di trabao. Haci dieta di forma controla. Number di suerte: 16, 32, 2.

**Tauro**  
No wak atas, bo no por rebiba amornan pasa. E recuperacion ansha economico a yega. Suavisa

bo caracter y no agobia e compañeronan. Bo por haya verkoud, cuida bo mes pa purba evit'e. Number di suerte: 83, 79, 8.

**Geminis**  
Si bo no tin pareha, disfruta di bo libertad. Ta momento pa haci e biahe di bo soñonan. Bo ta pensando pa cambia di trabao, warda algun dia. No retrasa mas bo bishita n'e dentista. Number di suerte: 65, 41, 3.

**Cancer**  
Purba mantene calma cu bo pareha. Tanto gasto lo caba pa resenti bo economia. Lo bo sña maneha bo mashinnan

nobo pa bo trabao. Pone atencion na bo curpa y si bo ta cansa, descansa un rato. Number di suerte: 33, 36, 4.

**Leo**  
Bo personalidad, awe, ta arebatador. Bo economia ta bay bon, pero no comete exceso. E ta bon considera den bo posicion di trabao. Disfruta di e energia ey cu bo ta posee. Number di suerte: 45, 21, 9.

**Virgo**  
Romanticismo lo reina den bo curason. Parti di bo presupuesto bo lo inverti den un biahe inespera. No nenga di siña cos nobo na trabao. Stress lo manifesta den forma di

dolor di cabes. Number di suerte: 25, 78, 4.

**Libra**  
Un hende hopi interesa pa bo no sa con pa bisa bo. Sea cuidadoso cu bo placa, no ta momento pa riesga. Lo bo ricibi un oferta importante di trabao. Respeta bo oranan di soño of cansancio lo vence bo. Number di suerte: 49, 57, 5.

**Scorpio**  
E recuerdonan di amor pasa por haci bo sufri. Inverti den stockmarket, ta e momento pa tuma decision. Medita detenidamente e ofertanan prome cu bo cambia di trabao. Un malestar di caracter leve ta menasa. Number di suerte: 25, 58, 9.

**Sagitario**  
Dia seductor, no lo tin hende pa resisti bo. Momento di crecimiento economico lento, pero sigur. Bo hefenan lo por haci bo un bon oferta. Descansa te ora cu bo

recupera di e cansancio acumula. Number di suerte: 92, 95, 2.

**Capricornio**  
E condicionnan astral ta ideal pa felicidad. Si bo ta precipita den finansa, lo bo tin problema. Bo trabao ta rekeri un esfuerzo di bo parti. Salud lo compañia bo, disfruta di bida. Number di suerte: 29, 45, 8.

**Acuario**  
Den amor, mester duna pa ricibi. No haci inversion ariesga. Un etapa nobo laboral lo haya bo prepara. Pone mas interes pa reestablece, anima bo mes. Number di suerte: 65, 53, 5.

**Piscis**  
Bo pareha mester di bo sosten, no defraud'e. No tuma decision economico a la lihera. Colabora cu bo compañeronan y tur cos lo ta mas agradabel. Bo ta mas fuerte cu eik, asina ta no keha. Number di suerte: 25, 45, 7.

# CACHO RIBA CAYA A MORDE FERROZMENTE UN PEATON DEN PINDASTRAAT



Dialuna atardi a drenta informe di cu un cacho a ataca un peaton den Pindastraat y e ta herida, mesora a dirigi tanto polis como ambulans na e sitio.

Na yegada di e patruya a bin compronde cu aki ta trata di e mesun cacho di caya cu ya caba a ataca 5 persona recientemente y awor a ataca un otro



persona ferozmente. Na yegada di e ambulans nan a atende e victima y

a transporte pa hospital. Polis a busca un solucion pa asina ningun hende

mas bira victima di e cacho ey cu ta sali riba caya ataca hende.



Prome Minister Evelyn Wever-Croes:

# PROME MINISTER A ELABORA RIBA E CARTERA DI ORGANISACION GUBERNAMENTAL DURANTE PRESENTACION DI E RELATO ANUAL 2023



ORANJESTAD – Prome Minister Evelyn Wever-Croes durante e Conferencia di Prensa di Gobierno di Aruba, a presenta e Relato Anual 2023 di su ministerio di Asuntonan General,

Innovacion, Organizacion Gubernamental, Infraestructura y Planificacion Teritorial na unda den 4 capitulo e ta elabora riba cada ministerio. Den e di tres capitulo Prome

Minister ta elabora riba e ministerio di Organizacion Gubernamental cu ta un parti hopi importante di su ministerio. Bou e capitulo aki ta cay:

Departamento di Recurso Humano (DRH):

Aki e Relato Anual ta muestra un informe amplio di e trabounan di aña 2023 y hopi importante pa remarca ta cu aki ta refleha con e cantidad di personal ta bahando y consecuentemente tambe e gastonan di personal ta bahando.

Bureau Interne Diensten (BID):

Esaki ta curason di Gobierno y ta esun cu ta duna e servicjonan interno, e magazijn pa

henter Gobierno y e Relato Anual ta muestra logronan impresionante.

Dienst Burgerlijke Stand en Bevolkingsregister (DBSB/CENSO):

Den e paragraf aki por lesa riba tur e trabounan y logronan di Censo na 2023. Un logro grandi y di elogia ta cu segun un estudio por mira cu Censo ta logra atende su bishitantenan den menos di 7 minuut di tempo.

Hulpbestuurskantoor (HBK):

Aki ta refleha e cifranan a base di transaccionnan haci entre otro di Censo, WEB, Elmar y SETAR.

Het Bureau Multi Functionele Accomodaties

(MFA's):

E bureau aki ta maneha e 4 edificionan di MFA na Noord, Paradera, San Nicolas y Santa Cruz.

Prome Minister ta invita e pueblo di Aruba pa lesa e Relato Anual 2023 completo y asina keda bon informa riba tur e logronan y trabounan di su ministerio di Asuntonan General, Innovacion, Organizacion Gubernamental, Infraestructura y Planificacion Teritorial.

Esaki ta posibel riba e Facebook di Gabinete Wever Croes, riba website di BUVO of via e plataforma di issuu: <https://issuu.com/>

## LOTTO TA INTRODUCI UN MIEMBRO NOBO DI INSTACASH “BUCKETS OF CASH”!

ORANJESTAD – Diabierna 10 di mei, Lotto, e loteria di Aruba, ta contento di por anuncia un integrante nobo “Buckets of Cash” den e famia di Instacash cu lo duna bo e oportunidad pa gana placa cash al instante!

Abo ta cla pa gana placa instantaneamente y no mester warda pa sorteo? Desde dialuna awo, 13 di mei Lotto lo trece un adicion mas na e famia di Instacash cu ta yama Buckets of Cash.

E wega di Buckets of Cash

ta costa solamente 3 florin cu lo tin diferente premio cash y bo por gana te cu Afl. 6.000,-!

Con pa hunga?

Bishita bo rebendedo di Lotto preferi y pidi pa bo Buckets of Cash di Instacash desde dialuna awo. Ora bo cumpra ewega di Buckets of Cash, bo ta ricibi un ticket for di bo rebendedo preferi. Riba e ticket bo ta wak diferente hemchi cu placa y riba cada un tin 2 number. Match cualkier dos (2) di bo numbertan ganado cu e numbertan den e

mesun hemchi y gana e premio den e hemchi cu bo a match. Cada hemchi ta wordo hunga separa.

Instacash ta dunabo e oportunidad pa hunga bo weganan preferi manera 5X The Cash, 10X The Cash, 20X The Cash, Bingo, Money Tree, Match for Cash, Gold Mine, Hot Numbers, e famia di Instant Jackpot, Tic Tac Cash, Shooting Star y awo Buckets of Cash cu ta dunabo e chens pa gana placa al instante!

Lotto, E Loteria di Aruba




tin diferente wega, Catochi, Big 4, 1-OFF, Zodiac, Wega di Number di Korsou di Lotto, Lucky 3, Multi-X, Lotto di Dia, Lotto 5, Mini Mega y cu su Mega Plus y e diferente weganan di Raspa y Gana y Instacash. Cumprando

Lotto bo ta contribui na deporte riba nos isla. E meta ta pa organisa loteria, cambia bida di su hungadonan y na mes momento inverti den deporte local pa medio di donacionnan na e comision di subsidio.



## POLIS Y AMBULANS A BAY PA UN ACCIDENTE CU UN MOTOCICLISTA HERIDA NA SANTA CRUZ



Diamars atardi a drenta informe di un accidente cu hende herida na Santa Cruz, mesora a dirigi tanto polis como ambulans na e sitio. Na yegada di e patruya a bin compronde cu aki ta trata di un accidente entre un auto y un

motociclista unda un brommer no a mira un auto tras di un van y a subi caminda y dal den porta di e Toyota Vitz blanco. Debi na e caida e motociclista a resulta herida. Na yegada di e ambulans nan a atende e victima.

## CHAUFFEUR NO A REGULA SU VELOCIDAD NI A MANTENE DISTANCIA A BAY DAL TRAS DI UN AUTO PARIBA DI CAYENA MALL



Dialuna atardi a drenta informe di un accidente pariba di Cayena Mall, mesora a dirigi un patruya na e sitio. Na

yegada di e patruya a bin compronde cu aki ta trata di un accidente unda cu e chauffeur no a regula su velocidad ni mantene

distancia a bay dal tras di e auto su dilanti. Afortunadamente ningun hende a resulta herida.



**TA BUSCA PARTIDORA DI CORANT PA AREA DI**  
Simon Antonio - Pos Chikito  
Brazil - Sanicolas  
**HORARIO: 7.30 PM**

Contact: 585-9500  
E-mail: solodipueblo@gmail.com



# FORTALEZA PA FAMILIA

Scirbi pa Pastor Marcel Balootje

## TENE CUENTA NOS CURPA TA TEMPEL DI SPIRITO SANTO

E curpa cu nos tin no ta di nos mes, e ta di Dios, pasobra ta Dios a forma nos den barica di nos mama, y ningun hende a forma nan mes.

Locual hende ta bisa cu ningun hende tin nada di bisami kico mi ta haci cu mi curpa, ta algo cu ta demostra lo siguiente:

\*Un mente cu tin falta di conocimiento di e palabra di Dios.

\*Un boca rebelde.

\*Un persona cu no a haña ta necesario pa reconoce Dios, den su bida ( Romanonan 1:28-32.)

Tambe e tin hopi di demostra e tempo trabahoso cu nos ta bibando aden ( 2 Timoteo 3:1-5).

Nos curpa ta algo di gran balar, pasobra e Spirito di Dios ta biba den nos.

Ta pesey ora hende mete cu bruheria, idolatria, y santeria, hende su mentalidad ta cambia pasobra nan a contamina, locual Dios a traha puro, limpi y berdadero.

1 Corintionan 3:16-19 ta para scirbi: Bo so no sa cu boso ta e tempel di Dios, y cu e Spirito di Dios ta biba den boso? Si un hende destrui e tempel di Dios, Dios lo destrui e. Pasobra e tempel di Dios ta santo, y esey ta loke boso ta.

Awor tene cuenta cuanto hende ta destrui nan mes cu;  
Adicion na Droga.  
Adiccion na Alcohol  
Adulterio y Fornicacion  
Inmoralidad/  
Homosexualismo  
Lesbianismo.  
Transgender.

Orguyo

Arogancia

Materialismo

Tur esey ta sosode ora hende dicidi cu ta nan ta manda riba nan curpa, y no kier haci locual Dios ta bisa. Hopi biaha nos ta mira hende bunita pafo, pero paden nan tin dolor y nan mente ta hopi confundi.

Den 1 Corintionan 6:18-20 e palabra di Dios ta bolbe splica atrobe: Huy for di tur inmoralidad. Tur otro pica cu un hende comete ta pafor di e curpa. Ma e hende immoral ta peca contra su mes curpa. Of boso no sa cu boso curpa ta e tempel di Spirito Santo kende ta den boso. Kende boso tin di Dios, y cu boso no ta pertenece na boso mes. Pasobra boso a wordo cumpra pa un preis; pesey glorifica Dios den boso curpa.

E asunto aki nos tin di comprende bon pa asina reconoce nos identidad den Cristo Hesus, caminda nos a wordo traha segun imagen y semehansa di Dios.



Y laga nos haci tur locual ta posibel pa lanta nan den e caminda di Dios manera Efesionan 6:1-4.

E tempo no ta facil, pesey e esfuerso ta necesario, especialmente awor cu nos ta mira cu inmoralidad y abominacion kier domina mundo henter.

Awor mas cu nunca nos oracion mester ta constant, y no lubida ayuno y lesamento di palabra, y no keda sin congrega, pasobra e forsa spiritual ta necesario pa nos tur.

Dios no kier pa ningun hende bay perdi, pero pa tur por yega na bida eterna den Cristo Hesus.

Dicidi awor pa Señor.

Sinceramente,  
Pastor Marcel Balootje.

## VWS SLUIT TIJDELIJK CONTRACT MET MEDICAIR VOOR AIR AMBULANCE TUSSEN CARIBISCH NEDERLAND, CURAÇAO

Het Ministerie van Volksgezondheid Welzijn en Sport (VWS) heeft kennisgenomen van de problemen en groeiende bezorgdheid over de code rood vluchten (air ambulance) in Caribisch Nederland. VWS heeft in overleg met Fundashon Mariadal (FM) de volgende voorzieningen getroffen.

Om de connectiviteit van air ambulance tussen Caribisch Nederland, Curaçao en Aruba te waar-

borgen heeft VWS een contract afgesloten met Medicaire (vooralsnog voor 2 maanden). Hiermee neemt VWS tijdelijk de contractuele verantwoordelijkheid op zich voor de beschikbaarheid van een air ambulance voor de verzekerden van Caribisch Nederland richting Curaçao en Aruba, die 24/7 beschikbaar is. FM zal medisch personeel beschikbaar stellen voor code roodvluchten met Medicaire. Intussen staat de Learjet van

Medicaire gestationeerd op Bonaire. Sarpa zal ambulancevluchten naar Colombia blijven uitvoeren.

Om uit de huidige impasse te komen heeft VWS besloten om op korte termijn een onderzoek te laten verrichten naar de ontstane problemen en om te komen tot een duurzame oplossing voor ambulancevluchten tussen de Curaçao, Aruba, Sint Maarten en Caribisch Nederland

**OLIVE TREE'S  
PRE-PAID  
FUNERAL PLAN**

**PAY AS YOU CAN**

Piedraplat ☎ 582 0000  
Sanicolaas ☎ 584 8888 | 5820000  
Habri dialuna pa diabierna | 8:00am-4:00pm

Olive Tree Social Department ☎ (+297) 743 7411  
www.olivetreefuneralhome.com



# DILANTI WELL DONE SUPER-MARKET UN CHAUFFEUR A REVERSE BAY DAL TRUCK STACIO-

Dialuna merdia a drenta informe di un accidente dilanti di Well Done Supermarket na Santa Cruz,

mesora a dirigi un patruxa na e sitio. Na yegada di e patruxa a bin compronde cu e chauffeur di e Hyun-

dai Getz a reverse y a bay dal e truck. Afortunadamente no tabata tin hende herida.



ORANJESTAD - Diahuebs mainta, Prome Minister Evelyn Wever-Croes a presenta durante un conferencia di prensa di Gobierno, e Relato Anual (Jaarverslag) di su ministerio pa aña 2023. Un di e topiconan cu Prome Minister a cubri e mainta aki, tabata innovacion.


Prome Minister a splica cu pa cu e topico aki den e Relato Anual tin 3 paragraf di cual cada un ta cubri e 3 institucionan cu ta atende cu innovacion den su ministerio. E institucionan aki ta: Aruba Futura Foundation, Directie Informatie Voorzieningen Automatisering (DIA), y Directie voor Innovatie. 1 Aruba Futura Foundation Futura ta un fundacion cu a wordo lanta pa implementa e vision di innovacion na Aruba. Futura tabata tin varios proyecto bou di su encargo di cual Edutech ta esun cu mas a resalta. E proyecto di Edutech ta ofrece scolnan e oportunidad di gana fondo pa asina por cumpli cu e proyectonan innovativo

## Prome Minister Evelyn Wever-Croes PROYECTONAN DI INNOVACION LO SIGUI TA UN PRIORIDAD PA GABINETE WEVER-CROES II

- cu nan a diseña.
- 2. Directie Informatie Voorzieningen Automatisering(DIA) E departamento aki ta encarga cu automatizacion di Aruba en general. Den e relato anual tambe ta haya informacion di kico tur a wordo haci cu e departamento aki.
  - 3. Directie voor Innovatie Prome Minister a indica cu e departamento aki ta uno nobo, y cu a wordo institui pa atende cu innovacion.

Manera ta conoci, innovacion ta e futuro di nos muchanan y ta di gran importancia, pa sigui ofrece nan e medionan necesario pa engrandec nan conocimiento den e area aki. Gabinete Wever-Croes tin e compromiso pa sigui bin cu proyectonan innovativo, yudando asina e futuro generacion pa tin e conocimiento necesario pa den futuro por subi e mercado laboral exitosamente.

Pa mas informacion di e Relato Anual 2023 por click: [https://issuu.com/gabinetewevercroesaruba/docs/jaarverslag\\_algemene\\_zaken\\_2023](https://issuu.com/gabinetewevercroesaruba/docs/jaarverslag_algemene_zaken_2023)



8								
		3	6					
	7			9		2		
	5				7			
				4	5	7		
			1				3	
		1					6	8
		8	5				1	
	9					4		

		8		3		5	4	
3			4		7	9		
4	1				8			2
	4	3	5		2		6	
5								8
	6		3		9	4	1	
1			8				2	7
		5	6		3			4
	2	9		7		8		

Paardenbaaistraat 10, Oranjestad, Aruba Tel.: (297) 525 - 7555  
www.lottoaruba.com  
Resultado : Sorteo 8 Mei 2024 Merdia

<b>CATOLICHI</b> Sorteo # 4260 0451 8230 6098 X2 BIG 4 Sorteo # 4260 2256 X2 X2 Sorteo # 2316 3488 ZODIAC Sorteo # 4260 9756 Libra LUCKY 3 Sorteo # 1134 011 X2	<b>LOTTO 5</b> Sorteo # 0 x Jackpot 0 x Match 4+ 0 x Match 4 0 x Afl. 12,00 Joker Letter Proximo Jackpot <b>260.000,-</b>	<b>LOTTO DIA</b> Sorteo # 0 x Jackpot 0 x Match 4 0 x Afl. 8,00 Proximo Jackpot <b>56.000,-</b>	<b>MEGA</b> Sorteo # 0 x Jackpot 0 x match 4 0 x Afl. 500,00 0 x Afl. 50,00 0 x Afl. 15,00 Mega Ball Proximo Jackpot <b>460.000,-</b>	<b>MEGA</b> <b>Afl. 610.000,-</b>	<b>KORSOU</b> Sorteo # 
---	---	---	--	--------------------------------------	-------------------------------



# FUNDACION SCOL TEATRO ARUBA TRIBI: TRIBI DI EXPLORA Y DESAROYA BO TAL-



ORANJESTAD, 7 mei 2024: Diamars atardi den un conferencia di prensa hopi ameno mr. Daylan Krozendijk conhuntamente cu sra. Joan Danies a informa cu Aruba tin un Scol di Teatro nobo: "Fundacion Scol Teatro Aruba: TRIBI".

Di unda e idea a nace? Tribi ta e prome scol di Teatro na y pa Aruba. E idea a nace despues cu Prins Bernard Cultuurfonds Caribisch Gebied (PBCCG) a pidi Jeugdtheaterschool Drazans di Cu-

raçao pa haci un sondeo di e situacion di teatro na Aruba. Asina nan a bin cu nan prome proyecto na Aruba cual tawata 20 Hours of Theatre. Eynan Daylan Krozendijk a bin den contacto cu Drazans y a cuminsa un colaboracion unda cu hasta Curaçao a bay cu algun hoben pa participa na e proyecto di Drazans 'Week Zonder Naam Curaçao 2023'. Y ta na Curaçao e combersacionnan a cuminsa for di un iniciativa di Daylan pa por cuminsa cu un scol di Teatro na Aruba mes y

awe cu orguyo nos por introduci na pueblo di Aruba TRIBI.

Ken ta e cara nan di TRIBI?

Daylan Krozendijk ta un hoben profesional cu pasion pa Teatro y a studia Docente di teatro na Hogeschool voor de Kunsten Utrecht na Hulanda. Despues di a completa su estudio, el a bin di biaha Aruba unda cu desde 2019 e ta fungiendo como Docente di Drama na Instituto Pedagogico Arubano (IPA) dunando lesnan di drama na e futuro maestronan di scol primario na Aruba.

Joan Danies no ta desconoci den e mundo teatral aki na Aruba. Joan ta 2e graads CKV-docent cu specialisacion den teatro. Desde 2008 e ta trahando na EPI como CKV-docent dunando les den tur disciplina di Arte, pero cu un enfasis y afinidad special pa teatro. Apesar di esey Joan tin un trayectoria largo den e mundo di teatro y cu diferente reconocemen-

to pa su aporte na cultura.

Prome salida di TRIBI

E meta principal ta pa e hoben por desaroya su mes riba e disciplina aki. Den e disciplina di teatro e hoben ta siña expresa su mes y esaki ta algo hopi importante no solamente como artista pero sigur tambe como individuo. Pa cuminsa cu esaki nos ta cuminsa cu TRIBI su prome proyecto: The Theatre Warm Up. E proyecto aki ta pa mucha 9 pa 12 aña y hobennan entre 13 cu 18 aña cu ta curioso pa explora e mundo teatral. Den un total di 9 les cu lo tuma lugar tur diasabra cuminsando 18 di mei e alumnonan lo sera conoci cu diferente tecnica di actuacion. Pensa riba uzo di bos, uzo di curpa, tecnica di lus, diferente forman di teatro manera comedia,

tragedia, teatro absurdo y mas.

Pa culmina e serie di lesnan aki e studiantenan hunto lo traha riba un presentacion final pa presenta dia 6 di juni anochi. Si bo conoce un mucha of hoben cu ta interesa den explora e mundo di teatro, comparti e informacion cun'e! E participacion tin un costo di 150 florin pa participante y lo tuma lugar na Cueba di Mascaruba na Dominicanessenstraat 12.

Pa mas informacion por haya nan riba Facebook y Instagram bou TRIBI Aruba of por manda un mail na [info@tribiaruba.com](mailto:info@tribiaruba.com) A finalisa bisando: "Nos ta invita tur mucha y hoben pa TRIBI di join nos warm up, TRIBI di explora bo talento, TRIBI di comparti bo creatividad!".

**Clasificados**

SOLODIPUEBLO@GMAIL.COM  
CEL. 585 9500

SOLO Di Pueblo

**THE THEATRE WARM-UP!**

Les di Teatro pa mucha y hoben.

**Fecha**

Mei	18	25
Juni	1	8 15 22 29
Juli	5	6

**Orario**

Grupo di mucha	9.00-10.30
Grupo di hoben	10.45-12.15

**Edad**

9-12	13-18
------	-------

**Lugar**

Cueba di Mascaruba, Dominicanessenstraat #12

**Prijs Afl 150,- PP**

**Contacto:**  
5630298 of 5621717

**Inscripcion:**  
[info@tribiaruba.com](mailto:info@tribiaruba.com)

Prins Bernard Cultuurfonds





# CON PA CUIDA BO SALUD MENTAL STRATEGIA PA BIENESTAR INTEGRAL



Den un mundo yen di demanda- y retonan constante, cuida nos salud mental ta fundamental pa nos bienestar general. Salud mental no ta trata solamente di e ausencia di trastornonan mental, pero tambe di cultiva un mente

balansa y resiliente cu por enfrenta e altibahonan di bida cu gracia y fortaleza. Den e articulo aki, nos lo explora diferente strategianan pa cuida bo salud mental y promove un bienestar integral.

**Practica cuido propio**  
Cuido propio ta esencial pa mantene un balans emocional. Dedicar tempo tur dia na actividadnan cu ta trece alegria y relacion, sea practica yoga, lesa un bon buki, bay un paseo den naturalesa of simplemente descansa.

**Establece limitenan saludabel**  
Siña bisa "no" ora ta necesario y establece limitenan cla den bo relacionnan y responsabilidadnan. Respeta bo mes necesidadnan i prioridadnan ta fundamental pa mantene bo salud mental den bon estado.

**Promove relacionnan positivo**  
Cultiva relacionnan saludabel y di apoyo cu amigonan, famia y sernan ker. Conexion social ta vital pa bienestar emocional, p'esey ta busca actividad y gruponan cu ta permiti



bo conecta cu otro mun manera significativa.

**Practica gratitud**  
Fomenta un actitud di gratitud dor di practica e aprecio diario di e cosnan bon di bida. Mantene un diario di gratitud of simplemente tuma algun momento cada dia pa refleha riba e bendicionnan den bo bida por tin un impacto positivo riba bo bienestar mental.

**Mantene un estilo di bida saludabel**  
Cuida bo curpa dor di un cuminda balansa, ehercicio regular y suficiente sosiego. Bienestar fisico y mental ta estrechamente relaciona, p'esey cuida bo curpa ta fundamental pa mantene un mente saludabel.

**Practica di atencion completo (mindfulness)**  
Atencion completo ta un practica cu ta encera prestacion di tension consciente na e momento presente sin husga. Meditacion, respiracion consciente y otro tecniconan di atencion completo por yuda bo reduci stress, aumenta claridad mental y mehora bo bienestar emocional.

**Busca yudansa profesional ora ta necesario**  
No tene miedo di busca yudansa profesional si bo ta sinti cu bo ta bringa cu bo salud mental. Terapista, consehero- y psikiatranan ta capacita pa ofrece sosten y tratamiento pa un

variedad di problema di salud mental, di stress y ansiedad te cu depresion y un trastorno di come.

**Desconecta for di rednan social**  
Aunke e rednan social por ta un herment util pa keda conecta, nan por ta tambe un fuente di stress y comparacion constante. Tuma descanso regular di rednan social y pone limite riba nan uzo pa proteha bo salud mental.

**Practica resiliencia emocional**  
Resiliencia ta e capacidad pa recupera for di diversidad y mantene un sentido di forsa interno contra e retonan di bida. E ta cultiva resiliencia dor di practica aceptacion, optimismo y adaptabilidad den situacionnan dificil.

**Cuida bo salud mental ta un acto di amor propio**  
Corda cu cuida bo salud mental ta un acto di amor propio y un inversion den bo bienestar a largo plaso. Priorisa bo salud mental y ta busca activamente forman pa cultiva un mente saludabel y balansa den bo bida diario.

Den resumen, cuida bo salud mental ta fundamental pa bo bienestar integral. Incorpora e strategianan aki den bo bida diario y ta haci auto-cuido un prioridad. Fortaleciendo bo salud mental, lo bo ta mas ekipa pa enfrenta e retonan di bida cu calma, claridad y resiliencia.

"Señor ta mi wardador, mi'n tin falta di nada. Den cunucu di yerba berde E ta ponemi sosega. E ta hibami na awa trankil pa mi bolbe haya forza." *Salmo:23*

Fundacion Facilidatnan Deportivo  
tin e tristo deber di anuncia fayecimento di:

**SRA. LIBIA MARIA LAMPE-CROES**

Na bida, Tanta di nos coleganan  
Sra. Jeanine Croes y Sr. Kenny Croes

Directiva, Staff y Personal di Fundacion Facilidatnan Deportivo ta expresa su mas profundo condolencia na Jeanine, Kenny y famia.

Cu Dios duna e famia forza den e tempo dificil aki.



# CAMARA DI SEGURIDAD A CAPTA AUTO CU A HIT & RUN DEN PARKINGLOT DI HOTZONE NA PALM BEACH



Diamars anochi a drenta informe di un accidente den e parkinglot di e hotzone na Palm Beach, mesora a dirigi un patruya na e sitio. Na yegada di e patruya a bin compronde cu aki ta trata di un accidente hit & run

unda un auto a dal esun staciona y a sigi core bay manera nada a pasa. Afortunadamente un di e camaranan ta na e angulo unda e accidente a sosode y polis di trafico a presenta pa asina e bay tras di e chauffeur aki.

Laga tur loke ta spera mi ta bunita  
Laga tur locual cu mi encontra na caminda ta bunita  
Laga tur locual cu mi laga atras keda bunita y  
Laga esakinan termina den tur buniteza.

Autor: Cado Wever.

Cu inmenso dolor na nos curason, nos ta anuncia fayecimento di nos ser stima:

## Lurbia Maria Maduro

Cariñosamente yama: "Lulu of Mamita"

\*11-12-1927 - †27-04-2024

Vda. di Tyberth Linsay cu a wordo entera cu honor Militar na Arlington USA.



Ex empleada di Telefoondienst +/- 1947

Ex empleada di Openbare Bibliotheek na Wilhelminastraat 1958-1960

Ex empleada di Bestuurskantoor voormalige archief & registratie nu bureau BID +/- 1961-1974

Ex empleada di Instituut Coudewater gemeente Rosmalen

Ex empleada di Arbeidsbureau Veghel Ned.

Ex empleada Mgr. Zwijsencollege Veghel Ned.

Ex empleada W.V.E.O Veghel Ned.

Na number di su yiunan:

Hermine Linsay

John Linsay y famia na Hulanda

Nieta y nieto: Jessica Linsay y George Linsay

Sobrina(o)nan: Rosa Wever y famia / Louisa Wever

Francis Wever y famia

Omar Maduro

Nectali Maduro

Margarita Maduro

Sobrina stima: Carmen Maduro

Sobre sobrina(o)nan:

Aimeé Robert y Jay Lovell yiu Zenny-Ann Henriquez

Ismay Robert y yiu Zayden Briesen

Joel Geerman y Miloushka Trimon y yiu Kaëly Geerman

Richnelda y Joathan Kock Vries y yiunan Jahziënne Kock y Jahlainey Kock

Jaylene Vries y Marshall Petronilia y yiu Xaithyël Petronilia

Manera su nieto: Ramsey y Giselle Acosta y famia

Aldwin Acosta y famia

Zuster Jacoba Dirksz-Krozendijk y famia

Comper y comer: Edgard Boekhoudt y Louisa Hart y famia

Fabio y Editha Croes-Maduro y famia

Iha: Judith Croes

Franklin Krosendijk

Ayudante di cas: Ana Antonia Del Rosario Gomez

Marietje Pestano de Agrela y Freddy Rosina

Fabiola y Chis

Prima(o)nan: Ros y casa Vis-Croes y famia

Betty Harms y famia

Edwin Angela y famia

Wit Gele Kruis: Janin Godoy-van Hooft, Rachel, Myléne, Sandra, Magaly, Sharine, Lourdes, Liesbeth y Sharléne.

Demas famia: Maduro, Linsay, Hanief, Khan, Laclé, Vries, Kock, Wever, Robert, Petronilia, Acosta, Dirks, Krozendijk, Boekhoudt, Hart, Croes, Geerman, Pestano de Agrela, Rosilo, de Kort, Henriquez

Ta invita pa acto di entierro cual lo tuma lugar na Aurora Funeral Home diasabra 11 di mei 2024 di 2'or pa 4'or di atardi. Despues lo sali pa Santana Catolico na Paradera.

Nos disculpa si den nos tristesa nos por a lubida algun famia of conócir.